



古今姓氏書辨證卷二十一

六止

下

理

出自臯陶之後歷虞夏

商周世爲大理

以循命侯爲氏

始

項羽傳秦將軍章邯使軍候始成使羽注曰姓始名成

士

出自祁姓帝堯之後劉累爲夏御龍氏其孫商時徙封爲  
豕韋氏周武王時因封爲唐氏成王時徙杜城又爲杜氏  
杜伯爲周宣王大夫無罪見殺其子隰叔奔晉生蔣字子  
輿爲晉獻公士師朝無姦官國無敗政因其有功命以官

爲士氏薦生司空士穀薦孫會字季謚曰士武子生文子  
燮共子魴燮生宣子句句生獻子鞅鞅生昭子吉射及臯  
夷魴字季生彘裘其族有獻子士富及士渥濁士弱士文  
伯士彌牟士丐士茁士蒺漢魏間有交趾刺史士燮又左  
傳秦士稚宋士平衛士榮皆其族唐李遠知選有王忠者  
被放吏謬書其姓爲士忠遠曰調者三萬無士姓此必王  
忠吏叩頭服罪詳此乃當時調者無士氏非謂天下無士  
氏也

侯

風俗通古賢人侯子漢藝文志有侯子一篇李奇注曰或  
作俾子此必侯氏也

子

出自帝嚳次妃有娥氏之女曰簡狄姊妹三人行浴於元  
邳水中見玄鳥墮卵簡狄吞之孕而生契契長而佐禹治  
水有功帝舜命爲司徒封於商姓子氏禮緯曰以玄鳥生  
子故爲氏焉史記褚先生曰子茲也茲益大也宜從褚說  
契生昭明昭明生相土詩所謂相土烈烈海外有截者生  
昌若昌若生曹圉曹圉生冥爲司空勤其官而水死冥生  
振振生微微生報丁報丁生報乙報乙生報丙報丙生主  
壬主壬生主癸主癸生天乙是爲成湯成湯伐夏弔民放  
桀于南巢踐天子位生太丁外丙仲壬皆前卒

○案此本  
尚書注疏

與史記殷本紀外丙仲壬皆繼  
世爲君者不同當以史記爲正

湯崩立太丁之子太甲是



爲太宗太甲生帝沃丁帝太庚太庚生帝小甲帝雍已帝  
太戊太戊爲中宗中宗生帝仲丁帝外壬帝河亶甲河亶  
甲生帝祖乙祖乙生帝祖辛帝沃甲沃甲崩立祖辛之子  
祖丁祖丁崩立沃甲之子南庚南庚崩立祖丁之子陽甲  
陽甲之弟曰帝盤庚帝小辛帝小乙生帝武丁是爲高宗  
高宗生帝祖庚帝祖甲祖甲生帝廩辛帝庚丁庚丁生帝  
武乙武乙生帝太丁太丁生帝乙乙生帝辛是爲紂紂不  
道周武王誅之立其子武庚祿父爲諸侯以續商祀武庚  
挾三監以叛成王誅之立帝乙之子微子啟爲宋公奉成  
湯之祀得用天子禮樂爲二王之後作賓于王家微子卒  
弟微仲衍立微仲生宋公稽稽生丁公申申生湣公共及

煬公熙共生厲公鮒祀鮒祀生僖公舉舉生惠公觀觀生  
哀公哀公生戴公戴公生武公司空司空生宣公力力以  
國授其弟穆公和和又以國授宣公之子殤公與夷華父  
督弑與夷迎穆公子馮于鄭而立之是爲莊公莊公生閔  
公捷及桓公禦說禦說生襄公茲父茲父生成公王臣王  
臣生昭公杵臼及文公鮑鮑生共公瑕瑕生平公成成生  
元公佐佐生景公頭曼

○案原本作顯曼今正

能以善言責躬而熒

惑退舍及卒公子特殺太子而自立是爲昭公昭公生悼

公由

案宋悼公名購由此脫購字

由生休公田田生威公辟兵辟兵生

剔成及宋君偃齊湣王滅之又黎國與宋同姓而蕭國出  
於宋皆子姓也宋之子孫分爲戴武桓穆莊之族其後爲

華向皇樂魚蕩鱗仲孔褚師氏皆有譜而當時見於經傳者曰子游昭公子公子穀生公孫鄭大司馬公孫邛公孫鍾離公子寅公子御戎公子朱公子固公孫援公孫丁公孫忌又襄公之子曰司城須孫曰孔叔文公之子曰公子圍龜字子靈平公之子曰太子痤公子城成公之子曰公子周字子高昭公之弟曰啟文公少子曰公子肥元公之弟曰母弟辰公子地莊公之孫曰大司馬公孫固皆宋子姓又秦大夫蒲子虎楚大夫子疆子捷子駢子孟子貝宋大夫子韋之類皆子姓也

梓

其先周官梓人之後以世官爲氏春秋時魯大夫梓慎

市南

元和姓纂曰楚有市南熊宜僚後以爲氏按莊子以宜僚爲市南子

似先

高麗扶餘種也唐武德中有右驍衛將軍似先英問又陳儒傳荆南監軍朱旼攻殺節度使段彥謩僖宗遣中人似先元錫慰撫之又李訓傳訓嘗遣中人似先希逸按邊

史華

元和姓纂云衛公子史食采于葉因氏焉左傳作史華謹按魯閔公二年狄人因史華龍滑與禮孔二人曰我太史也則華禮皆氏龍滑與孔皆名華音去聲非以葉爲華也

今以史華龍滑自分爲兩人或曰姓史華名龍滑皆誤矣  
史晁

世本曰衛史晁之後謹按晁與朝通必史朝氏也

李蘭

代北複姓

士孫

春秋時齊大夫有士孫氏因所居名其里魯襄公二十五年崔杼葬莊公于士孫之里是也漢博士平陵侯士孫張至其孫灌津侯萌之子賢頴凡十世有譜系唐有士孫瑞  
集十卷

士弱

元和姓纂曰晉士莊子弱爲獄官晉人謂之士弱氏按此左傳全文記當時語未必後世有此氏也

士丐

元和姓纂曰晉大夫士丐之後謹按春秋晉有二士丐其一乃宣子而相士鞅逆齊侯于河者別有士丐未知何人之後

士季

出自晉司空士蒍之後貞子士渥濁生莊子士弱弱生士文伯瑕瑕生景伯彌牟別爲士季氏

士貞

下一字仁宗廟諱嫌名姓源韻譜曰晉人謂之士貞氏按

此左傳全文記當時語未必後世有此氏也

俟利

○案此條與下俟斤俟亥俟畿俟奴五條原本次子扁氏後俱依廣韻移正

後魏匹孤之後其官者俟利猶中國方伯也後以官爲氏

俟斤

謹按唐史突厥大臣曰俟斤世其官而無員限其先世官者爲俟斤氏後改爲艾氏

俟亥

代北姓後魏獻帝次弟爲俟亥氏

○案魏官氏志獻帝以次弟爲俟氏後改爲亥

氏與此異

俟畿

代北俟畿氏後改爲河南畿氏

○案魏官氏志有俟畿氏後改爲畿氏畿畿形近而

譌

俟奴

俟奴氏後改爲俟氏

子游

世本鄭穆公生子偃字子游之後謹按春秋鄭游氏無子字

子有

元和姓纂曰魯有子字子有後見禮記宋有子有恭叔今詳禮記無此事且依林氏存之

子夏

元和姓纂曰陳宣公生子夏後爲氏誤矣謹按左傳此卽



夏氏春秋以來未嘗有子夏氏姓纂承襲久誤以夏爲妣姓之後故指子夏爲複姓今駁正之

子干

姓纂有氏無解謹按左傳楚公子比字子干嘗奔晉又歸楚自立棄疾脅之自殺後世必有以字爲氏者

子羽

元和姓纂曰晉公族子羽後爲楚邑大夫謹按左傳衛鄭皆有行人子羽晉韓起庶子又有子羽今云晉公族必韓宣子之後以字爲氏

子叔

出自姬姓衛公孫剽字子叔穆公少子也嘗爲衛君謂之

殤公生太子角其孫黑背以王父字爲氏謂之子叔黑背  
春秋時魯大夫聲伯亦曰子叔嬰齊其後去子爲叔氏

子家

出自姬姓魯莊公會孫歸父字子家其孫以王父字爲氏  
子服

出自姬姓魯公族仲孫蔑之子佗別爲子服氏謚懿伯生  
子服惠伯椒椒生子服景伯何後有子服子伯

子國

世本曰鄭穆公生子國發發生子產僑簡成子僑生子思  
參參生子玉珍武子珍生子樂卑顯莊子爲子國氏謹按  
春秋子產家止謂之國氏

子旗

齊惠公孫欒施字子旗鄭七穆氏豐施亦字子旗未知何人之後爲氏

子革

元和姓纂曰世本宋司城子革後又曰季平子支孫爲子革氏皆誤矣謹按春秋季氏無子革唯樂喜字子罕爲宋司城審此言則子罕氏非子革氏必欲存此一氏宜改曰出自姬姓鄭穆公子子然生丹字子革奔楚爲右尹後人以爲子革氏則近而有據

子臧

出自姬姓曹公子欣時字子臧遜國於負芻子孫以王父

字爲氏

子車

秦大夫以王父字爲氏春秋時其三子奄息仲行鍼虎殉葬秦穆公國人哀其皆秦之良爲賦黃鳥詩者

子駟

鄭穆公子駢字子駟之後鄭大夫有子駟德公見釋例謹按春秋駟氏無子字釋例亦無子駟德公

子南

出姬姓鄭穆公孫游氏之子曰楚字子南別爲子南氏又芊姓楚莊王子追舒字子南其後亦別爲子南氏

子占

世本曰陳威子占書書生良堅堅子以王父字爲氏

子師

出自鄭大夫子師僕之後漢有北平太守子師將石

子禽

陳僖子生惠子得爲子禽氏按論語有陳子禽毀仲尼於子貢陳僖子相去未遠必僖子之子字子禽而其子若孫以王父字爲氏

子木

出自芊姓楚平王太子建字子木爲少師費無極所譖王使人殺之建懼奔吳其子孫以字爲氏

案楚別有令尹子木

子皙

出自姬姓鄭穆公孫駟氏之子曰駟黑字子皙別以字爲子皙氏黑生印或云芊姓楚共王子公子黑字子皙乾谿之難子干爲君子皙爲司馬棄疾殺之其孫氏焉

子孔

世本曰鄭穆公生公子嘉字子孔之後謹按春秋有二子孔司徒孔生公孫洩洩生孔張士子孔生子良

子人

出自姬姓鄭穆公之弟語字子人爲大夫其孫九以王父字爲氏春秋鄭伯使子人九行成于晉是也

子士

世本曰魯叔孫成子生齊季爲子士氏謹按左傳孟僖子

妾曰子士之母則子士乃孟僖子之後

子泉

世本曰齊頃公生子泉湫因氏焉左傳齊有大夫子泉捷  
新序說同謹按春秋以泉爲淵蓋淵泉通用

案淵字爲泉  
係唐避諱改

子罕

世本曰鄭穆公子喜字子罕生子展舍之舍之生子皮虎  
或作子軒氏春秋罕氏無子字

子蕩

元和姓纂曰世本宋桓公生子蕩因氏焉謹按春秋宋蕩  
氏亦無子字而宋大夫樂轡楚大夫屈罷皆字子蕩未知  
子蕩果誰後也

子午

元和姓纂曰世本楚公子午之後齊大夫子午明

子俛

英賢傳云子俛子齊人著書五篇論兵法與穰苴同按此  
卽俛氏不必爲複姓解見子扁氏

子儀

左傳宋向魋之臣曰子儀克其先必以王父字爲氏如鄭  
君子儀楚申公鬬子儀之類

子西

出自芊姓楚平王子申字子西爲楚令尹白公之難子西  
死焉後世以王父字爲氏



子寤

世本曰季平子生昭伯寤其後爲子寤氏

子仲

謹按詩曰子仲之子婆娑其下則子仲陳國世族風俗通曰陳宣公子子仲之後以字爲氏誤矣

子郢

元和姓纂曰世本衛公族昭子郢之後按此必衛靈公子郢也郢字子南

子石

世本曰陳威子生子石難自別爲子石氏

子穆

世本曰陳僖子生子穆安因爲子穆氏

子高

左傳衛大夫子高魴之後

子然

世本曰鄭穆公子子然之後謹按春秋七穆然氏無子字

他姓亦然

子乾

世本曰齊頃公子子乾之後以王父字爲氏春秋時有子

乾皙

子期

出自芊姓楚平王子結字子期爲大司馬白公勝作難殺

子期於朝後世以字爲氏

子庚

芊姓楚令尹公子午字子庚其孫以王父字爲氏

子囊

元和姓纂曰左傳齊大夫囊帶之後

子公

世本曰齊頃公字子公之後謹按春秋鄭公子宋亦字子

公

子沮

世本曰陳烈子生子沮與後爲子沮氏

子襄

世本曰齊桓公子子襄之後

子旅

周大夫氏悼王之入次于子旅是也

子季

世本曰楚公族子季氏

子成

世本曰魯季平子生子成叔彭侯之後

子扁

元和姓纂曰莊子有子扁子誤矣謹按莊子有扁子一曰子扁慶子嘗與孫休言者其曰子扁子正如子列子之類古者以子爲男通稱故弟子稱師名加子於姓氏之上子

列子子扁慶子是姓纂如此類皆誤收爲複姓今駁去子  
字止存扁氏餘可槩見云

侯呂陵

後周太祖賜韓襄姓曰侯呂陵氏後改爲呂氏

侯伏斤

後魏侯伏斤氏後改爲伏氏

侯伏侯

侯伏侯氏改爲侯氏

侯力伐

代北姓後改爲河南鮑氏

古今姓氏書辨證卷二十二終

古今姓氏書辨證卷二十三

七尾

尾

元和姓纂曰古有尾生或云卽微生高誤矣謹按微生別一氏尾亦一氏也後漢太尉劉虞爲公孫瓚所殺虞故吏尾敦刼虞首歸葬注曰尾敦姓名

偉

謹按後漢蔡邕傳曰光祿勳偉璋有名貪濁注曰偉姓璋名也漢有姓偉舊姓書未有此氏今增入

尾勺

周成王分魯公以商民六族一曰尾勺氏

八語

圉

出自周禮夏官圉師掌養馬者後世以官爲氏左傳楚大夫圉公陽以邑爲氏

呂

出自姜姓炎帝裔孫爲諸侯號共工氏伏羲神農之間能霸九州有地在宏農從孫伯夷佐堯掌禮爲秩宗徧掌四嶽爲諸侯伯號太嶽又佐禹治水有功賜姓曰姜氏曰有呂封爲呂侯呂者膂也言能爲禹股肱心膂以養物豐民人也呂侯國在蔡州新蔡厯夏商世祀不絕周穆王時呂侯入爲司寇訓夏贖刑作呂刑之書宣王時改呂爲甫後

爲強國所并當商季世有呂尚字牙號太公望蓋呂侯枝  
孫起漁釣佐周文王爲武王太師定天下有大功封爲齊  
侯命書曰五侯九伯汝實征之以夾輔周室太公望生丁  
公呂伋伋裔孫莊公生僖公祿父及夷仲年年生公孫無  
知僖公生襄公諸兒公子糾桓公小白無知殺襄公小白  
自莒入立爲君用管仲爲相九合諸侯不以兵車天子賜  
之胙遂霸諸侯其後世系具春秋戰國策○案此三  
字有誤嫡夫  
人三人皆無子內嬖長衛姬生公子無虧諡武孟鄭姬生  
孝公昭葛嬴生昭公潘密姬生懿公商人少衛姬生惠公  
元宋華子生公子雍又庶子七人爲楚七大夫史失其名  
桓公薨孝昭懿惠四公繼立昭公生舍惠公生頃公無野



舍母魯女曰子叔姬無野母曰蕭同叔子頃公生靈公環  
及公子角公子成靈公夫人顏懿姬之姪驪聲姬生莊公  
光戎姬生公子牙穆孟姬生景公杵臼莊公薨景公立景  
公生悼公陽生晏孺子荼公子嘉公子駒公子黔公子鉏  
一曰南郭且于景公薨立荼國人納陽生而出荼陽生生  
簡公壬爲陳常所弑簡公後四世康公貸大臣田和遷之  
於海濱盡取其國春秋時齊諸公子以名見者有東公得  
臣公子彭生仲孫湫公子彊公子鉏公孫敖公孫還公孫  
明公孫皙公孫伋頃公二子曰公子固字子城公子鑄字  
子公又二孫曰公孫捷字子車公孫青字子石又子商子  
周公孫夏公孫揮皆呂氏也康公七世孫禮秦昭襄王十

九年自齊奔秦爲柱國少宰北平侯二子伯昌仲景伯昌  
生青以令尹從漢高祖封陽信侯謚胡青生臣上柱國唐  
隨州刺史仁宗卽其後也秦丞相文信侯不韋陽翟人漢  
高后父臨泗侯呂公單父人二子澤周呂令武侯釋之建  
平康侯澤二子台呂王產梁王台四子嘉東平侯通燕王  
卮東平侯平下邳侯釋之三子則建平侯種不其侯祿趙  
王其族中微至尙書令霸居東萊爲東萊呂氏霸十一世  
孫虔字子路魏徐州刺史萬年亭侯徙居東平任城虔孫  
行鈞徙居河東行鈞後魏東平太守六世孫雄案唐世系表雄二子崇禮崇  
表雄乃行  
鈞孫此作六  
世孫不合生崇禮粹崇○案唐世系表雄二子崇禮崇  
粹崇粹兵部郎中此當有脫文  
唐兵部郎中生誼相肅宗誼生仁本春卿夏卿冬卿仁本

磁州司馬生璜琳璜生源倬皓琳生伸皓生伯禽時中絳  
伸生緄綱紆綸紡績○案唐世系表紉作締績作縵纓綜春卿尚衣奉御  
汝

汝與女同夏少后遺臣有女艾魯大夫女賈馮異傳有賊  
汝章據槐里自稱將軍又春秋時秦有不更女父

處

師古曰史記趙有處子

褚

出自子姓宋共公子段字子石食采於褚其德可師號曰  
褚師生公孫肥子孫因爲褚氏漢梁相褚大元成間有褚  
先生名少孫裔孫重始居河南陽翟重裔孫招安東將軍

揚州都督關內侯孫碧字武良晉安東將軍始徙丹陽五  
子頴說洽裕祥頴生翼字謀遠晉護軍將軍散騎常侍贈  
衛將軍生希豫章太守譜絕洽生裒字季野晉衛將軍中  
書令侍中錄尚書事征北大將軍贈太傅都鄉元穆侯所  
謂皮裏陽秋者二子歆熙歆字功安

○案唐世系表作幼安

散騎常

侍祕書監生爽字宏茂晉義興太守贈金紫光祿大夫五  
子秀之粹之陟之裕之淡之秀之字長倩宋太常四子雋  
之湛之貞之法顯雋之生淵澄淵字彥回齊司徒錄尚書  
事驃騎將軍侍中贈太宰謚文簡所謂落水三公者淵二  
子賁綦賁字蔚先齊侍中生霽譜絕綦生向字景政梁廬  
陵長史生翔字世舉梁吏部尚書譜絕淵弟澄字彥道齊

侍中右軍將軍譜絕法顯鄱陽太守二子炤炫炤字彥先  
召爲國子博士不拜炫字彥緒齊散騎常侍贈太常三子  
游澣漢澣字士洋梁中書侍郎湘東王府諮議叅軍澣二  
子濛隨濛太子舍人生玠案唐世系表漢梁中書侍郎生  
濛生玠與世系不合字溫理陳御史中丞生亮字希明唐左散騎常  
侍陽翟侯四子遂賢遂良遂功遂年遂良字登賢唐中書  
令河南文忠公相太宗高宗諫立武后天下謂之褚河南  
三子彥甫彥仲彥季彥甫生僑休休五世孫虔七世孫昭  
北燕有中書郎匡

許

出自炎帝裔孫伯夷之後周武王封其裔孫文叔於許以

爲四嶽之嗣至許元公結爲楚所滅遷於容城子孫分散  
以國爲氏衛大夫許爲一曰許公爲是也其後自容城徙  
北新城縣都鄉樂善里秦末有許猗隱居不仕曾孫毗漢  
侍中太常生德字伯饒安定汝南太守因居平輿四子據  
政邈勁據大司農生允字士崇魏中領軍鎮北將軍三子  
殷動猛允孫式式二子皈字仲仁晉司徒掾四子茂詢疑  
雅詢字元度四子元之仲之珪珪宋給事著作郎桂  
陽太守生更慧齊太子家令冗從僕射晉陵縣侯二子懋  
梁天門太守中庶子生享德次子政字義先別居邵陵亨  
陳衛尉卿安陸許氏出自詢五世孫君明梁楚州刺史法  
光生紹

案唐世系表君明生宏周宏周生法光與此世數不符

字嗣宗唐陝州刺史

安陸郡公四子善伯裔智仁圉師圉師相高宗黃門侍郎

同中書門下三品謚簡生自收自遂自正欽寂

案唐世系表紹四子

長善善生力士力士生欽寂欽明此欽寂上應有脫字

生右金吾大將軍輔乾卽海

東使者次曰宕州刺史輔德欽明生鴻臚少卿誠惑太僕

卿誠言以上爲高陽許氏高陽北新城縣卽唐博陵郡地

也汝南許氏漢

案漢上疑脫後字

許劭字子將與兄虔齊名汝

南人稱平輿淵有二龍喜評人物謂之月旦評其後有因

官居太原者皆著望後漢博士慎字叔重亦平輿人所謂

五經無雙許叔重作字說今行於世其後有居會稽陽羨

者晉陵許氏漢徐州刺史聖卿安陵許氏漢有許博

著大博經

巨

前秦符堅將梁山巨武縛慕容暐

姪

○案廣韻無姪字字彙補音白許切此條原本次咀氏後今依音附巨氏後

唐藝文志有姪威渾輿經一卷

所

謹按後漢永初二年劇賊畢亮等數百乘船寇平原縣令劉雄與門下小吏所輔浮舟追至厭次津與賊合戰並爲賊擒輔求代雄死賊縱雄而殺輔人謂輔孝盡愛恭義極君臣唐高麗有大酋所夫孫近世所氏望出平原風俗通曰宋大夫華所事之後誤矣左氏華御事爲司寇非所事也姓源韻譜曰所說文曰伐木聲也詩曰伐木所所古虞



衡之官主伐木聞聲遂以爲氏亦誤矣今詩無此語所  
之字得非許字訛其字畫乎案穀梁傳隱九年俠卒俠者  
所俠也詳此則華所事之先  
已宜有此氏。案許所古通何許卽何所也文選謝文暉  
在郡臥病詩良辰竟何許注許猶所也二字形不相涉鄧  
氏以爲字  
畫之訛非

楚

出自晉趙孟家臣楚隆之後蓋其先以地若字爲氏姓書  
皆以爲芊姓楚國滅於秦而氏焉誤矣

舉

音舉。案廣韻舉以諸切此條原本收平聲  
九魚今以鄧氏原音舉改入上聲楚氏之後

姓解曰椒舉之後

莒

出自曹姓陸終之後周武王封茲輿期於莒是爲莒子其

國之子弟以國爲氏莒僕莒展莒慶是也漢有緱氏令莒  
誦其後爲平昌人左傳有齊大夫莒恒爲申驅將

叙

出姓苑

蕘

出姓苑

咀

出姓苑

褚師

事見褚氏褚師段字子石生公孫丁及石疆疆別爲石氏  
而段後有褚師子肥其族仕衛者曰褚師定子生聲子褚

師比及褚師圃褚師子申皆衛大夫

巨母

王莽時韓博上言有奇士長丈大十圍來至臣府曰欲擊匈奴自謂巨母霸輜車不能載三馬不能勝臥則枕鼓以鐵箸食博意以莽字巨君母得篡盜而霸也莽聞惡之以事誅博留霸新豐更其姓爲巨母氏謂因文母太后而霸王符也

九麋

羽

出自姬姓鄭穆公之子揮字子羽其孫頡爲馬師以王父字爲氏

禹

禹姓卽夏禹之後世代罕聞至漢世有從革從禹而章字子夏在長安西號曰城西萬子夏爲京兆尹門下督後至殿中侍中諸侯貴人爭欲揖章莫與京兆言者疑此萬與禹姓同也又鄆子國在瑯琊其後以爲氏恐此鄆也禹與萬通用

字

出姓苑

栩

陳留先賢傳有栩氏又漢董賢傳有栩丹

鄆

出自妘姓鄆子之國其地瑯琊開陽縣是也魯昭十八年  
鄆子籍稻邾人襲而滅之子孫仕宋以國爲氏

甫

出自姜姓炎帝裔孫伯夷爲堯太嶽封其後爲甫侯子孫  
以國爲氏

府

風俗通漢有司徒掾府悝

武

春秋魯隱公時王使武氏助伐翼其子來魯求賄漢有武

臣爲趙王梁鄒孝侯臣生德

案史記功臣表梁鄒孝侯武

則最非武臣之後今此作臣生德德德生東武亭侯最  
生最俱誤儒漢書作虎唐避諱作彪

生敬襄侯嬰生中涓濟陰侯山附後以耐金國除山附

生陳留太守內黃侯都都生汝南太守宣字文達宣二子

尚浮浮字元海司徒左長史生臨漳令靜

○案原本脫生字靜字据唐世

系表補

字伯濟靜生烈字文照烈生光祿勳篤字猗伯生太

常中壘校尉悌悌生九江太守臨潁侯端端生魏侍中南

昌侯周周三子陔韶茂陔字元夏晉左僕射薛定侯陔生

太山太守嗣薛侯越越生威遠將軍嗣薛侯鋪鋪生太子

洗馬嘏嘏生洛州長史歸義侯念生平北將軍五兵尚書

晉陽公洽別封大陵縣賜田五十頃因居之生祭酒神龜

神龜生本州大中正司徒越王長史襲壽陽公克已沛國

武彪裔孫周魏南昌侯生陵晉左僕射薛侯五代孫洽魏

晉陽公因始封居太原永水或號太原武氏治曾孫居常

北齊鎮遠將軍生儉永昌王諮議生華隋東都丞生士稜

士讓士逸士護士稜唐司農少卿宣城公生君雅君雅生

敬真崇真太子洗馬士讓唐太廟令路公生惟良懷道懷

運惟良衛尉卿生攸宜攸緒攸宜雍州刺史都案唐世系表作冬

此疑誤官尚書建王攸緒揚州長史隱嵩山神龍拜太子賓

客巢公不起景雲封安平王亦不拜生君案唐世系表作若訥懷

道左監門長史生攸暨攸寧攸案原本脫攸字今補寧春冬夏尚

書納言建昌王江國公案原本王譌五江下脫國字据唐外戚傳改岐州刺史

生文瑛荀瑛攸暨駙馬司禮卿定王司徒楚公生崇敏崇

行崇敏宗正卿上黨王崇行國子祭酒懷運淄州刺史生

攸歸攸正

○案唐世系表外戚傳俱作止此疑誤

攸望攸歸九江太守

○案唐外

戚傳攸歸歷司屬少卿至齊州刺史贈九江王此疑有誤

宗正卿孫良臣商州刺史攸

正恒安王司賓卿女玄宗惠妃追封貞順皇后攸正子昕

忠信忠鴻臚卿信祕書監同正字

○案唐世系表昕忠鴻臚卿信忠祕書監同正

此似誤以忠信爲單名或忠信上有脫字

攸望會稽王

○案原本脫王字据唐外戚傳補

少府

監蔡公孫徹洋州刺史士逸始州刺史陸公

○案唐世系表作贊國節

公此疑誤

生志元仁範安業志元倉部郎中生懿宗嗣宗懿宗

河內王殿中監汴魏州刺史神正道大總管生瑾瓌仁範

雲陽令生尚賓重規載德尚賓河間王益府長史重規高

平王司禮卿

神龍朔方大總管禮部尚書生成節成藝載

德賴川王殿中監右千牛大將軍生平一敬一平一考功



員外郎生集備就登集梓州刺史備殿中御史生元衡門

下侍郎平章事成都尹登生儒衡殿中御史思元一名安

業零陵令追封渤海王生求已太僕少卿士護唐工部尚

書利荆二都督應國公卒贈司徒周公又贈太師追崇魏

王配食高祖廟

攷證原本卒訛明又追崇魏王配食高祖廟作太王太后追崇魏王云太王太后四

字未詳並據唐書武士護傳改護女爲則天皇后生中睿宗護子元慶元

爽元慶宗正少卿生審思再思三思審思追封申王再思

宮門郎追封蔡王三思梁王夏春天三尚書內史神龍司

空同三品降德靜爲節愍太子所殺生崇訓崇謙崇烈崇

撫崇操崇訓駙馬太常卿太子賓客生繼植左衛將軍崇

謙光祿卿梁公崇烈尚乘奉御元爽虞部郎中少府少監

生承嗣魏王春天二尚書納言文昌左相實封一千三百  
戶生延基駙馬右羽林將軍郟公延安光祿卿邗公延壽  
衛尉少卿燕公延秀駙馬太常少卿桓公承業陳王左驍  
衛大將軍生延暉駙馬陳公生○案生字疑誤羽林衛將軍生暉  
斌業次子延祚光祿少卿鄆公延嘉祕書少監莒公又風  
俗通趙平原君勝封武成因氏焉○案廣韻九麋引風俗通云宋武公之後漢有  
武臣是應君以單姓武氏爲出自宋武公若武成一  
條通志氏族略引入複姓下與武氏無涉此誤引

舞

出姓苑

輔

唐監察御史魏傳弓劾奏中人輔信義見竇懷忠傳唐齊

州臨濟人輔公祐爲盜有傳

案唐書作  
輔公祐

柱

出自古烈山氏之子柱爲稷神後世以爲氏一云周柱下  
史之後

詡

出姓苑

豎

廟諱嫌名亦作豎寺人小臣之稱曹豎侯孺之類後世或  
以爲氏

庾

古者倉氏庾氏之後子孫以世官爲族漢有庾乘者司徒

辟有道徵不就二子疑遁

案姓纂亦作遁而晉書作道

疑魏太僕遁廉

退不仕以諸子貴賜拜太中大夫遁二子某史失其名

案晉

書庾純傳劉斌議曰純兄峻以父老求歸峻不得歸純無得歸之理則純卽遁之子可知史未嘗失其名也

峻

字山甫晉御史中丞侍中常侍三子岷侍中長岑貞男琮

太尉掾

案晉書庾峻二子岷數無琮岷官至數晉吏部郎侍中長岑男爲劉元海所殺諡曰貞

某二子衮琛衮四子岫茂澤裙茂生願安城太守琛五子

亮懌冰條翼亮字元規晉太尉文康公懌西中郎將贈衛

將軍簡子冰字季堅晉車騎將軍贈司空忠成公條字幼

序贈左將軍翼字穉恭晉征西將軍贈車騎將軍肅子亮

三子會羲穌會一作彬羲字義叔晉吳國內史穌晉中領

軍羲二子準楷準一作淮豫州刺史西中郎將楷西中郎

將準生悅字仲豫宋江州刺史楷生鴻龢生恒字敬則尙  
書右僕射贈光祿大夫懌一子統晉建威將軍尋陽太守  
生立之宣城內史冰七子希襲友蘊倩邈柔希晉北中郎  
將徐克二州刺史護軍將軍友晉中書郎東陽太守蘊晉  
廣州刺史倩太宰長史邈會稽王叅軍柔晉散騎常侍希  
生攸之友生叔宣右衛將軍蘊生廓東陽太守二子登之  
宋豫章太守仲文宋吏部尙書登之生仲遠宋侍中仲文  
生宏遠齊江州長史宏遠生曜冰立孫道愍齊射聲校尉  
翼二子方之代父守襄陽者爰之輔國將軍宏遠從弟徽  
之御史中丞二子漪泳冰五世孫佩玉宋長沙內史生沙  
彌梁長城令沙彌生持梁尙書左戶郎又族人輝安北長

史生東吳國內史東生聞吳國內史闡生肅之湘東太守  
蜀人庾氏唐同州刺史崇生樸前蜀禮部尙書其族子  
四人傳美後唐都官郎中傳昌前蜀翰林學士傳素左僕  
射傳信翰林學士

主

○案此條原本次耦  
氏後依廣韻移正

宋政和中禁天下不得稱主及君乃改爲康氏

耦

元和姓纂曰詩曰耦維師氏寵臣之族也後氏焉

羽弗

○案此條原本次字  
文氏後依廣韻移正

孔至曰後魏改爲弗氏

宇文

出自匈奴南單于裔有葛烏菟爲鮮卑君長世襲大人至  
普回因獵得玉璽自以爲天授也俗謂天子爲宇文因號  
宇文氏或云神農氏爲黃帝所滅子孫遁居北方鮮卑俗  
呼草爲俟汾以神農有嘗草功因自號俟汾氏其後音訛  
遂爲宇文普回子莫那自山陰徙居遼西至後周追諡曰  
獻侯生可地汗號莫何單于闢地西出玉門東踰遼水孫  
普撥生止不勤止不勤生莫珪莫珪生遜昵延遜昵延生  
俟逗歸

案北周書作俟豆歸  
唐世系表作佚豆歸

自稱大單于爲慕容晃所滅

生六子一曰拔拔陵陵二曰拔拔壞三曰紇闡四曰目原  
五曰紇闡俟直六曰目陳拔拔陵陵號阿若彥仕後魏都  
牧主開府儀同三司安定忠侯以豪傑徙居代州武川

甫爽

○案此條原本次武都氏後依廣韻移正

世本曰宋有大夫甫爽文叔

武城

出自楚大夫食邑武城因以爲氏謹按春秋有二武城魯武城曰南武城曾參家也則楚邑宜曰北武城矣

武羅

元和姓纂曰夏武羅國之後謹按夏遺臣武羅必其後爲氏

武都

西秦錄有武都氏謹按武都者仇池之別名今成州是也其先以地爲氏



豎侯

元和姓纂曰宋有大夫豎侯息曹大夫豎侯孺息未詳所出謹按豎侯孺之說誤矣春秋曹伯之豎侯孺貨筮史乃曹之小臣姓侯名孺行賂于卜者非複姓也

主父

元和姓纂曰趙武靈王主父之後子孫以爲氏漢有主父偃宋開封人將仕郎宗旦生天經天經生主簿齊賢齊賢生詰字頴叔政和五年上舍

古今姓氏書辯證卷二十三終

古今姓氏書辨證卷二十四

十姥

姥

姓苑曰姥氏亦作媽

杜

杜伯爲宣王大夫無罪被殺因失其國子孫居杜城者爲杜氏而仕晉晉太子申生之傅曰原欵韓厥之御曰溷羅平公之宰夫曰蕢其族在秦者曰回在魯者曰橋曰洩回以力聞橋以母喪宮中無相得名所謂杜氏之葬在季武子寢西階下者是也洩事叔孫氏忠於其君避季平子難奔楚生大夫綽綽生段段生赫爲秦大將軍食采南陽衍

邑世稱爲杜衍赫小子秉上黨太守生南陽太守札宋中  
書舍人晁以道說之解書雲土云土古杜字也詩桑土是  
也土氏之先曰陶唐氏御龍氏豕韋氏其後爲唐杜氏有  
土薦土穀土會土勾土燮土鞅土吉射土富土魴皆唐杜  
氏也或作士氏誤也士員士弱士文伯士景伯是士氏西  
京雜記杜陵杜夫子善碁爲天下第一自言精其理者足  
以大裨聖教卽徙家者也孝宣帝布衣時游諸陵往來鄠  
杜間至隋唐都京兆杜氏韋氏皆以衣冠名位顯故當時  
語曰城南韋杜去天尺五二家各名其鄉謂之杜曲韋曲  
自漢至唐未嘗不爲大族周字長孺○案唐世系表札生周此疑周上有脫字  
三子延壽西河太守延考東河太守延年字幼公御史大

夫建平敬侯七子緩繼純熊紹緒綱

○案唐世系表延年六子無綱純作他他

與佗同其見于漢書杜周傳者惟緩佗熊及欽欽最知名此獨不及殆不可解

緩字元仁雁門太

守二子業彰熊字少卿荊州刺史生穰字子饒後漢諫議

大夫二子敦篤敦字忠信

○案唐世系表作仲信

西河太守生邦字

召伯中散大夫三子賓宏繁賓字叔達舉有道不就二子

翥崇翥字伯括太子少傅生畿字伯侯魏太僕卿

○案唐世系表

翥司空椽畿魏河東太守與此異

豐樂戴侯三子恕履

○案唐世系表履作理

寬恕

字伯務御史大夫幽州刺史生預字元凱晉荊州益州寧

州刺史征南大將軍荆南大都督長史駙馬都督開府儀

同三司當陽侯尚宣祖長公主有平吳大功注春秋左氏

傳行於世自號左傳癖宋尊崇祀典歷代賢臣惟預從祀

文宣武成王二廟古今無與爲比預四子錫耽躋尹錫字  
世嘏尙書左丞曾孫慙二子楚秀秀二子果皎 京兆杜  
氏漢建平侯延年二十世孫文瑤與義興公果同房文瑤  
隋浚州刺史生元道左千牛元道生含章定州司法叅軍  
含章二子綰繹繹秀容令生孟寅亞麟平亞字少公檢校  
禮部尙書綰京兆司錄叅軍生黃裳黃中黃裳字遵素相  
憲宗黃中峽州刺史黃裳二子勝載勝字斌卿天平節度  
使兼揚州租庸使遂家廣陵生庭堅字輔堯衛州刺史庭  
堅生審彤審彤二子昌業繼元 襄陽杜氏出自當陽侯  
預幼子尹字世甫晉弘農太守二子綝弼弼字君佐魏治  
書侍御史綝字宏固奉朝請一子襲字祖似

○案唐世  
系表作嗣上

洛太守二子標沖

○案唐世系表標作標以沖爲標子與此異

標字文湛中書

侍郎池陽侯沖字方進襲池陽侯生洪泰字道廓南徐州

刺史襲池陽侯三子祖悅祖字紹先員外散騎常侍悅

字望之上柱國吏部尚書顯字思顏後周侍中驃騎大將

軍雍州刺史安平公贈太尉六子景懋字公瑾常州刺史

景仲字世則鄜州刺史當陽侯勝字景驤濟州刺史景峻

湖州刺史景恭字慶之後周驃騎大將軍慶成公

○案唐世系表

作康城公此疑誤

景秀字彥之後周渭州刺史思寧公二子懿遜

懿隋殿內監甘棠公生乾播乾祐乾祚依藝依藝監察御

史鞏令生審言膳部員外郎修文館學士生閑奉天令閑

生甫字子美左拾遺檢校工部員外郎劔南四川節度叅

謀二子宗武嗣業

案元稹杜甫墓誌及唐書本傳甫一子宗武宗武子嗣業此誤

遜柏人

令生淹本縣中正三子行簡行則行敏行敏荆益二州都

督府長史南陽襄公二子崇憲崇慤

○案唐世系表作樂懿疑卽其字

崇

慤左司員外郎麗正殿學士二子希夷越州別駕希望河

西隴右節度八子信太子賓客位考功郎中湖州刺史召

詹事司直金城丞任河南府兵曹叅軍儒武進簿佑字君

卿相德順憲三宗供洪州長史佑三子師損式方從郁師

損工部郎中司農少卿二子德之宗之字有宗信州

刺史生羔

案唐世系表羔生宗之與此不合

潤州延陵令避亂徙居黃巖

式方字考元桂管觀察使五子惲富平尉懋興平尉悰字

永裕相武宗懿宗贈太師幽國公恂失其官悰泗州刺史

惛生裔休述休儒休從郁生牧顓顓字勝之生無逸○汧

水杜氏出自戴侯恕少子寬字務敏

○案唐世系表作務叔

孝廉郎

中曾孫曼石趙從事中郎河東太守初居鄴葬父汧水後亦徙居焉五世孫君賜生景宣明景生子裕字慶延隋樂陵令五子正元正藏正倫正儀正德正倫相高宗正藏隋行軍長史生志靜出繼正倫後爲安福令嗣襄陽公生僑懷州刺史僑生咸涼州都督損大理少卿損四子存介廙戩廙生曾冀兼羔曾左金吾兵曹叅軍冀太學博士兼河南尹羔刑部郎中二子中立思立中立義武軍節度使濮陽杜氏出自秦大將軍赫生威世居濮陽裔孫謨後魏濮太守因家焉謨生亮後魏陳留太守亮生伽北齊交州



刺史廣陵公伽生保隋雁門太守二子義博義寬義寬唐  
滕王府諮議蘇州司馬三子無忝慎行承志慎行荆益二  
州長史建平侯生鵬舉位宰相安州都督三子靈瑤鳳舉  
鴻漸鴻漸字之巽相代宗二子收威封鼎承志天官員外  
郎生暹相明皇暹生孝友殿中監昱

○案原本脫昱字給  
据唐世系表補

事中南朝有杜岸杜崩杜幼安兄弟三人皆有傳又杜僧  
明稜循吏杜驥杜慧慶文學杜之偉亦有傳後魏有杜銓  
北齊杜弼及子臺卿後周有杜杲有杜彥杜超節義則杜  
叔毗杜松贊循吏則杜纂皆有傳後蜀李匡長史杜淑後  
涼呂光部將杜進殿中監杜尙後燕慕容熙起承華殿典  
軍杜靜載棺詣闕上書極諫熙怒斬之南燕平原令杜雄

魯

出自姬姓周公子伯禽所封傳國三十四世至魯頃公滅  
於楚遷於下邑子孫以國爲氏世更二千石漢哀公間自  
魯徙扶風平陵漢魯匡爲王莽義和生武陵太守某某生  
恭字仲康漢司徒生謙隴西太守謙子旭太僕恭弟丕字  
叔陵爲侍中所謂五經復興○案興下疑脫者字魏荊州刺史芝自  
平陵徙郿縣南燕有尙書魯遂

古

出自姬姓周太王亶父避狄人之難去國於岐山之下自  
號古公後氏焉漢有京兆古生爲都掾史四十餘年善詆  
慢二十石隨以諧謔趙廣漢黜之京師以古掾曹爲俳戲

後漢東平憲王從事古霸長沙孝子古初唐高宗時部將古神威宋朝嶺外人古成之及進士第爲綿竹令嘗遇異人授道

伍

伍氏出自春秋時楚莊王嬖人伍參以賢智升爲大夫生舉食邑於椒謂之椒舉其子曰椒鳴伍奢椒鳴得父邑而奢以連尹爲太子建太傅費無極譖之王逐太子而殺伍奢及其子棠君尚尚弟員字子胥奔吳事闔廬爲卿破楚入郢以報父讎吳夫差時忠諫不見聽屬子於齊爲王孫氏

五

謹按史傳伍奢父子皆作五則伍五通用陳涉傳有鉅人五逢

仵

音午

姓苑曰襄陽多此姓晉有仵戎謹按唐忠義傳薛舉遣其將仵士政招降者劉鋹有賀州守將仵彥柔

虎

出自高辛氏子八元伯虎之後子華子虎以字爲氏風俗通有合浦太守虎旗

琥

黃帝之後

鄔

出自晉大夫司馬彌牟帥師平周亂納恭王有功食采於  
鄆爲大夫其地太原鄆縣是也子孫以邑爲氏又昭二十  
七年晉祁勝與鄆臧通室卽鄆氏也近世望出南昌宋撫  
州崇仁鄆氏延伯生綬綬生思思生執權字少達左宣教  
郎湖廣京西總領司幹辦公事

苦

莊子有南方之墨者苦獲

浦

浦元和姓纂曰晉起居注有尙書令浦詳或曰浦選

圃

見姓苑

吐火

○案此條至下魯步氏九條原本次古龍氏後依廣韻移正

河南官氏志魏代北人姓

吐萬

代北人姓

吐賀

後魏有吐賀真

吐羅

或作叱羅後魏官氏志吐羅氏改爲羅氏南陽有吐羅協

吐門

或作叱門後魏官氏志改爲門氏

吐難

後魏官氏志吐難氏

○案魏書今作土難氏

改爲山氏

吐缶

後魏官氏志改爲祝氏望出河南

吐渾

與吐谷渾獨狐渾渴足渾四氏並見補遺

魯步

西羌有魯步氏

古孫

○案此條及下古龍氏條原本次伍參氏條後依廣韻移正

元和姓纂曰賈孫氏後訛爲古孫氏音亦訛變

古龍

唐南蠻扶南國王姓古龍氏

五鹿

晉文公封舅犯於五鹿因氏焉漢有五鹿充宗風俗通曰氏於官者三烏五鹿

五王

東莞五王氏史記云自齊威王至王建爲五王建虜於秦子孫別以五王爲氏

五鳩

少昊氏以五鳩爲鳩民之官鳩集也其後以官爲氏後趙有將軍五鳩盧

五里

出姓苑



五相

吳相伍員子孫吳人號之五相之後事見元和姓纂

伍參

世本曰伍參之後楚昭王時有伍參蹇

虎夷

出姓苑

普屯

後魏太祖賜辛威姓普屯氏

補祿

英賢傳云晉惠帝時殿中中郎將補祿彪

吐谷渾

或作吐渾出自慕容廆庶兄吐谷渾後將所部居西零之  
西甘松之南極乎白蘭數千里其孫葉延曰禮云孫子得  
以王父字爲氏遂爲吐谷渾氏

古口引

後魏虜姓

戶盧提

唐吐蕃列傳德宗卽位遣使韋倫歸蕃俘是時乞立贊爲  
贊普姓戶盧提氏謂倫曰我乃有三恨云

扈地干

後魏官氏志扈地干氏改爲河南扈氏

普陋茹

○案此條原本次吐谷  
渾氏後依廣韻移正

代北人姓後改爲河南茹氏

十一薺

邸

風俗通漢上郡太守邸杜北齊酷吏行臺僕射邸珍字安  
寶中山曲陽人後徙洛陽隋吏部主事邸懷道諫煬帝幸

江都

底

○案此條原本次六止下梓氏後今案字  
從廣音都禮反依廣韻移十一薺邸氏後

漢功臣表魯侯奚涓無子封母底爲侯

案史記作毋疵漢  
書作底然底乃名

非氏也底氏後亦無表見者疑○案古婦人稱氏母  
底疑與蕭何夫人祿母同一例明有左都御史底蘊

米

西域米國胡人入中國者因以爲姓唐藝文志有米遂明

堂論一篇又回紇僕固部有米懷玉爲達干又有供奉歌者米嘉榮及其子米和郎五代有沙陀部人米至誠吳節度使今望出隴西高平

啓

音啟

出姓苑

十二蟹

解

謹按左傳晉郇瑕之地沃饒而近鹽卽河東解邑今之解州也晉解狐後有解梁不受楚賂以死致君命於宋

案左傳宣

公五年楚子闢宋傳晉使解揚如宋此云解梁與傳不合

解張字張侯爲卻克御破齊

師有功皆爲名大夫姓纂討論此氏最詳明可據今從之

唐百濟國大臣八姓一曰解氏又巴西解思明爲後蜀李壽征東長史壽僭立用爲謀主後坐勸立漢王廣爲太弟所誅

米禽

唐党項以姓別部有米禽氏事見去聲六至利氏

十三駭

楷

出姓苑

十四賄

隗

元和姓纂曰春秋時翟國隗姓子孫氏焉後漢隗囂出

天水成紀隗紹望出汝陰此說有據今從之謹按春秋時狄人伐虜咎如獲其二女叔隗季隗晉公子重耳娶季隗以叔隗妻趙衰又周襄王以狄伐鄭王德狄人立女隗氏爲后則隗亦赤狄之姓當時見於經傳者凡五種曰東山臯落氏曰虜咎如曰甲氏曰潞氏曰留吁鐸辰皆赤狄隗姓惟甲潞臯落別以其部爲氏餘二者有號無氏則隗之爲姓舊矣姓源韻譜曰天水成紀隗氏出自大隗之後此誤也莊子言黃帝見大隗于具茨之山蓋寓言非有是人不可以爲據西京折衝司馬隗仁與乞伏熾磐力戰五年乃得還姑臧沮渠蒙遜執其手曰卿孤之蘇武也以爲高昌太守

十五海

宰

後漢有西部都尉宰鼂後漢弘農人宰宣上言封大將軍妻爲邑君以媚梁冀

亥音海

孟子有亥唐晉平公時人河南亥氏後魏官氏志侯亥氏改焉

宰氏

元和姓纂曰范蠡傳云陶朱公師計然姓宰氏字文子夔正濮上人今詳此必單姓而姓纂誤爲複姓也

姓纂誤以爲宰且又指爲複姓  
外謬甚矣辯證蓋因其譌也

案計然姓  
宰氏元和

# 十六軫

軫眞上聲

姓苑云出自軒轅氏造車車後用橫木爲軫因賜姓軫氏  
元和姓纂曰春秋貳軫國後爲氏廣韻曰今吳縣有之

菌

○案此條原本次閔氏後依廣韻移正

## 出姓苑

## 閔

周大夫閔子馬字馬父生損字子騫爲孔子弟子後漢司徒掾閔仲叔子孫居太原南朝齊梁間何昌寓爲吏部尙書嘗有一客姓閔求官昌寓謂曰君是誰後答曰子騫後昌寓團扇掩口而笑謂坐客曰遙遙華胄前秦符堅將閔



古今姓氏書辨證卷二十四  
亮北燕太史令閔尙

古今姓氏書辨證卷二十四終

古今姓氏書辨證卷二十五

十七準

尹

周宣王時尹吉甫爲天子三公東遷之後世掌其職尹武公尹文公尹言多尹固尹辛尹圉皆爲卿大夫故詩言尹氏太師惟周之氏春秋亦書尹氏卒尹氏立王子朝以譏世卿漢功臣表有城父侯尹恢傳國三世後漢中郎將尹就壽春刺史尹耀福祿長尹嘉欲解印綬與復父讐女趙娥俱亡 牂牁大姓尹氏公孫述時保境爲漢遣使奉貢光武賞之又毋歛縣人尹珍字道真自以生荒裔從許慎應奉受經書還鄉教授官至荊州刺史後秦天水尹氏緯

字景亮仕姚興官至尙書左僕射號名臣贈司徒清河忠  
成侯又西州大族尹赤以佐命功爲姚萇大將軍左長史  
又有大將軍叅軍尹延年別部帥尹嵩京兆尹尹昭大將  
軍尹元寧朔將軍弘農太守尹雅又尹敞守杏城爲赫連  
勃勃所執後蜀驃騎大將軍右丞相尹奉後涼邱池令尹  
興符堅將尹國唐有御史大夫尹思正亦天水人

允

謹按春秋周王使詹威伯辭於晉曰先王居檮杌于四裔  
故允姓之戎居于瓜州杜預曰允姓陰戎陸渾之祖與三  
苗居於三危者然則允姓宜出於三苗元和姓纂曰允格  
之後允格金天氏之裔未知與三苗爲親疎也

尹文

齊定王時有尹文先王卽考成子從之學幻者漢藝文志  
名家有尹文子說齊宣王時事在公孫龍前劉向云與宋  
鉞俱游稷下者

尹公

衛大夫尹公佗之後

十九隱

隱

吳志廷尉監隱蕃自云曾隱公之後以謚爲氏蕃青州人  
逃奔吳欲爲亂事覺被誅又河間中尉隱哀北海人

二十阮

阮

後漢巴吾令阮敦生瑀字元瑜漢司空祭酒二子熙武都  
太守籍字嗣宗晉步兵校尉熙生咸字仲容晉散騎郎始  
平太守二子瞻字千里晉太子舍人孚字遙集晉丹陽尹  
鎮南將軍廣州刺史孚從孫廣籍生渾字長成晉太子庶  
子渾生深籍從祖諶生武字文業魏清河太守籍從祖略  
齊國內史生覬汝南太守二子放字思度晉交州刺史贈  
廷尉裕字思廣晉金紫光祿大夫東陽太守放生晞之南  
頓太守裕三子傭州主簿寧鄱陽太尉普驃騎各議參軍  
傭生歆之中領軍歆之生彌之寧二子腆祕書監萬齡郡  
從事普生長之宋中書郎族人修字宣子太子洗馬种字

德猷平原侯相漢侍中胥八世孫共字伯彥子侃字德如  
與嵇康友善位至河內太守皆望出陳留尉氏

偃

出自顯帝裔孫女脩生大業大業孫曰臯陶字庭堅爲舜  
大士明五刑有功賜姓偃氏封於河東爲諸侯貳軫州紂  
麥六羣舒皆其後也春秋時楚盡滅偃姓之國遂絕其後  
吳有大夫偃州員王莽時有偃宗

偃

偃音

後漢孝莊帝母偃氏諱明史記曰偃姓臯陶之後按此則  
偃姓後世或去人爲偃

偃

偃音

其偃切邵氏姓解音怨未知何據

晚

○案此條原本次宛氏後依廣韻移正

漢藝文志雜家有子晚子三十五篇齊人好議兵與司馬法相似姓書未有此氏今增入

圈

音捲

瑯邪圈氏風俗傳云因避仇改爲卷焉仍音求晚切

苑

音於阮切漢太山太守康字仲真渤海重合人見黨錮傳唐人家譜云商武丁孫受封於苑因氏焉或音怨非也楚莊王以常侍苑庚爲上卿芮國公苑君璋居馬邑生孝政其曰宛春之後者誤矣

宛

春秋左傳楚大夫宛春晉大夫宛沒齊大夫宛茂鄭大夫宛射犬字公孫未知孰爲先後其字或平聲後漢有下邳太守宛暹吳有吳興太守宛方

偃師

元和姓纂曰出自嬀姓陳悼太子偃師爲公子招所殺裔孫以王父字爲氏或曰周人食邑偃師氏焉今河南偃師卽其地也

卷子

世本衛文公後卷子子州氏焉

二十三早



散

上聲

周文王大臣散宜生之後或爲散氏姓書以爲宜生姓散誤矣

罕

出自姬姓鄭穆公之子曰公子喜字子罕其孫以王父字爲氏子罕生公孫舍之字子展子展生罕虎字子皮及其弟罕魍子皮生嬰齊字子蕎子蕎生罕達字子姚一曰武子賸子展弟曰公孫鉏字罕朔又晉獻公時有大夫罕夷不知其得氏之始

散宜

古今人表帝堯妃女皇散宜氏女也後有散宜生爲周文

王臣佐武王定天下

罕夷

元和姓纂曰晉大夫罕夷之後誤矣謹按罕氏名夷子孫何至兼其祖之姓名以爲複姓況後世未嘗有罕夷氏則姓纂援據誤矣竊意元和中置局討論容有諸儒臆說聚於其中而當時官長見簡牘繁穰不暇一一刊正謹一洗之無使後世轉失其真而姓氏訖無全書也

罕开

虞姓

二十四緩

緩

魏官氏志有如稽氏後改爲緩氏如稽一作緩稽

○案今本官氏

志作和稽

曩

音浣唐時荊州多有此姓也

皖

姓解曰音緩

琯

音管

出纂文要

滿

魏有滿寵爲揚州刺史生太尉翼翼生奮字武秋晉尙書令世爲山陽昌邑人墓在濟州金鄉分爲二族曰南滿北

滿云

二十五潛

阪上

元和姓纂曰上黨屯留人其先居阪上因氏焉晉惠帝時有殿中將軍阪上翳

二十六產

簡

元和姓纂曰晉大夫狐鞠居食采續邑號爲簡伯誤矣師父鞠居皆春秋時人而師父在前已爲簡氏

二十七銑

銑

出姓苑

扁

姓解曰音卞莊子有扁子爲孫休師

二十八獮

衍

出姓苑

展

出自姬姓魯孝公之子字子展其後有夷伯夷伯孫無亥  
爲魯司空隱公命以王父字爲展氏

遣

出姓苑

蹇

九輦切宋成都雙流蹇氏周輔字礪翁歷度支副使寶文閣侍制戶部侍郎知開封府中書舍人刑部侍郎終朝請大夫知廬州爲人深文刻核喜言利故老云嘗改鹽法病民東南大窮幾至於亂有傳二子逢辰屯田員外郎序辰亦爲三司副使懷安金水蹇氏翔生逢逢生綬朝奉郎綬生汝明紹興四年進士

單

出自姬姓周成王封少子臻于單邑爲畿內諸侯因氏焉春秋時有單伯曰襄公頃公獻公成公穆公武公平公皆爲天子卿士裔孫莊侯漢濟陰太守因家焉會稽太守長

沙侯熙又徙山陽宋德安單氏惠連生熙及煦煦字孟陽  
犯廟諱以字稱光祿卿有傳又駕部員外郎從化孟陽生  
颯朝議大夫颯生孝擇宣和六年進士

辯

出姓苑

雋

謹按後漢馬援征五溪蠻軍次下雋有壺頭與充兩道可  
入注曰下雋縣名屬長沙縣故城今辰州沅陵縣雋音字  
究反詳此卽或有上雋下雋二邑不疑之先以邑爲氏

娟

○案此條原本次免  
氏後依廣韻移正

已見下平聲一先廣韻收入此韻今兩存之

免

出自衛卿免餘之後以王父字爲氏

薊

出姓苑

案廣韻無此字篇海薊字通作薊音免今附入獮韻

鵠

出姓苑

輓遲

後魏官氏志輓遲氏後改爲展氏

二十九條

繳

神宗朱墨本第六十三卷三月戊午以左班殿直繳順爲



東頭供奉官

蓼

蓼出偃姓皐陶庭堅之後封國於蓼楚滅蓼子孫以國爲氏

烏洛

元和姓纂曰伯益仕堯有養烏獸之功賜姓烏洛氏支孫又以路洛爲氏史記曰大費子大廉爲烏俗氏俗誤作洛三十小

犀

與肇同亦作兆戰國策趙將軍犀賈之後

趙

趙氏之先與秦同祖出自顓帝高陽氏裔孫曰女脩女脩  
織玄鳥墮卵女脩吞之生子大業大業娶少典之子曰女  
華女華生大費與禹平治水土功已成帝錫玄圭禹受命  
曰非我能成亦大費爲之輔於是帝舜曰咨爾費贊禹功  
其賜爾皂旂爾後嗣將大出迺妻之姚姓之玉女大費拜  
受佐舜調馴鳥獸多馴服是爲柏翳生大廉大廉四世孫  
仲衍鳥身人言爲帝太戊御世有功以佐商國遂爲諸侯  
仲衍四世孫中湣生蜚廉蜚廉生季勝季勝生孟增孟增  
幸於周成王生衛父。○案史記作衛父此疑誤衛父生造父造父爲穆  
王御日馳千里攻徐偃王大破之以功封趙城子孫氏焉  
其地河東永安縣是也造父已下六世至奄父生叔帶叔

帶以周幽王無道去周仕晉文侯始建趙氏于晉國五世

生夙晉獻公戎御賜采邑於耿今河東皮氏縣耿鄉是也

夙弟衰字子餘

案趙安仁歐陽等皆云夙生共孟共孟生衰誤矣杜預注左傳曰趙衰者獻公戎御

趙夙之弟今詳春秋閔公二年夙爲戎御以滅耿僖公四年文公重耳奔蒲則夙爲衰之兄明甚必夙諡共孟衰諡

成季也驪姬之亂從公子重耳奔翟翟人伐虜咎如得二女

隗氏納諸重耳重耳以叔隗妻衰生盾衰從重耳亡於外

十九年遂得晉國立爲晉文公文公以衰爲原大夫升爲

上卿任以爲國政又以女妻衰

案趙世家趙衰既反晉之妻固要也翟妻此晉

之妻蓋是衰故妻或原聘此云又以女妻衰似誤解史記晉之妻三字

生原叔同屏季括樓

季嬰齊衰卒諡成子國人并字與諡稱之謂之成季子盾

嗣盾字孟嗣父爲卿諡宣子盾卒子朔嗣朔娶晉成公女

生武朔卒諡莊子屠岸賈之難朔客公孫杵曰及其友程  
嬰得朔遺腹子匿之既長從其母姬氏育于公宮其後晉  
景公疾卜之曰大業之後不遂者爲祟以問韓厥厥知趙  
孤在乃曰大業之後在晉絕其祀者其趙氏乎成季之勲  
宣孟之忠而亡其後爲善者其懼矣景公乃立武而反其  
田邑武平公時爲正卿有令名以主諸侯諸侯不敢名而  
字之曰趙孟趙孟卒諡文子文子生景子成成生簡子鞅  
鞅生襄子無卹襄子之子獻侯浣始以周天子命與韓魏  
三分晉地○案史記趙世家獻侯卒子烈侯籍立烈侯卒弟武公立武公卒復立烈侯子章爲敬侯滅晉  
分地此獻侯浣下當有脫文恭侯卒子成侯種立成侯卒子肅侯立肅  
子武靈王生惠文王何惠文王生孝成王丹孝成王生悼

襄王偃生幽繆王遷遷八年秦併六國趙人立遷兄嘉爲  
代王後降於秦秦使嘉子公輔主西戎西戎懷之號曰趙  
王世居隴西天水西縣至漢京兆尹廣漢之後居涿郡代  
踰千祀而僖祖皇帝生焉臣聞之太史氏曰僖祖立道肇  
基積德起功懿文憲武睿和至孝皇帝生於涿長於燕歷  
承清文安幽都三縣令生順祖惠元皇帝累官兼御史中  
丞贈右驍衛將軍實生翼祖簡恭睿德皇帝歷營薊涿三  
郡刺史生宣祖昭武睿聖皇帝贈太尉宣祖五子長邕王  
光濟次太祖皇帝次太宗皇帝次秦王廷美次夔王光贊  
太祖啟運立極英武睿文神德聖功至明大孝皇帝二子  
長魏懿王德昭次楚康惠王德芳生名連惟字惟字生名

連從字及守字從字守字生名連世字世字生名連令字  
令字生名連子字子字生名連伯字伯字生名連師字師  
字生名連希字太宗至仁應道神功聖德文武睿烈大明  
廣孝皇帝九子長漢恭獻王元佐次昭成太子元僖次真  
宗皇帝次魯靖王元份次陳文惠王元傑次韓恭懿王元  
偓次蔡恭惠王元偁次吳恭肅王元儼次代國公元億魯  
恭靖王後封商王生濮安懿王生舒王宗懿康王宗濮昌  
王宗晟懷王宗暉樊王宗輔建王宗蓋信王宗治蕭王宗  
博彭王宗衮崇王宗瑗襄王宗愈袁王宗勝景王宗漢陳  
韓蔡吳代五王生名連允字允字生名連宗字宗字生名  
連仲字仲字生名連士字士字生名連不字不字生名連

善字善字生名連汝字汝字生名連崇字秦悼王廷美十  
子曰高密郡王德恭字復禮廣平郡王德隆字日新潁川  
郡王德彝字可久廣陵王德雍保平軍節度使德鈞字子  
正忠正軍節度使德欽字丕從金城侯德潤字溫玉申王  
德文姑臧侯德愿字公謹武昌軍節度使德存字安世十  
子生名連承字承字生名連克字克字生名連叔字叔字  
生名連之字之字生名連公字公字生名連彥字彥字生  
名連夫字真宗膺符稽古成功讓德文明武定章聖元孝  
皇帝六子曰溫王禔次悼獻太子祐次仁宗皇帝次昌王  
祇次信王祉次欽王祈仁宗體天法道極功全哲神文聖  
武睿德明孝皇帝四子周懷靖王昉後封襄王唐悼穆王

明後封豫王燕悼懿王曦後封鄂王次英宗皇帝英宗體  
乾膺厯隆功盛德憲文肅武睿神宣孝皇帝六子長神宗  
皇帝次潤王顏嘉王次益王顏次岐王次吳王顥五  
王生名連孝字孝字生名連安字安字生名連居字居字  
生名連卿字神宗體元顯道法古立憲帝德王功英文烈  
武欽聖仁孝皇帝十四子曰成王侑惠王僅唐王俊襄王  
伸冀王侗哲宗皇帝次豫王价徐王侑陳王昺沂王偉次  
徽宗皇帝次燕王俱楚王似越王偁哲宗憲元繼道世德  
揚功欽文睿武齊聖昭孝皇帝一子越王茂冊贈太子徽  
宗聖文仁德顯孝皇帝子長孝慈淵聖皇帝次衮王禪鄆  
王楷荆王楫肅王樞景王杞濟王栩益王棫次欽宗皇帝



次邠王材祁王模莘王植儀王模徐王杓沂王鄂定王拱  
和王榛信王杲漢王椿安康郡王握廣陵郡王健陳王機  
相國公挺建康郡王模嘉國公椅溫國公棟涇王穗儀國  
公桐昌國公柄原王縱餘未出閤 扶風趙氏出自天水  
漢中大夫禹之後徙焉 河間趙氏與涿郡同出漢京兆  
尹廣漢支孫居潁川徙河東蠡吾縣又徙河間 酒泉趙  
氏其先因官于酒泉者自天水徙焉隋武侯將軍才卽其  
後 隴西天水趙氏公輔十二世孫融字長後漢右扶風  
大鴻臚七世孫瑤後魏河北太守瑤曾孫乾贊仕隋爲幽  
州刺史陽武公生元極唐忻州刺史元極生仁本相高宗  
二子誼案唐世系表作誼司僕少卿諫左羽林將軍誼生道先蒲

○案唐世  
系表作洪州錄事叅軍道先生憬字退翁相德宗憬四子

宣亮全亮元亮承亮天水之族又有賓生英特英特生叔

文三世爲忠武軍牙將叔文生肇昶珣保陳州抗巢賊有

功兄弟繼爲忠武軍節度使肇同平章事贈太尉昶亦贈

太尉珣贈侍中肇二子麓梁列卿霖梁駙馬都尉租庸使

戶部尙書珣字穀梁宣徽北院使新安趙氏徙京兆奉

天向樂令德曷○案唐世系  
表作德胃生景旦普安令景旦生唐城

平令漼然漼然生植字道茂嶺南節度使檢校工部尙書

謚簡生邽尉○案唐世系  
表作下邽令公儀及遵約仁約存約從約滂

存約興元節度判官二子隱字大隱相懿僖二宗隲字元

錫華州刺史隱三子光逢字延吉唐太常卿梁司徒平章

事光裔相後唐莊宗光嗣南漢劉龔宰相光逢生熙字績

臣梁諫議大夫光裔二子損益損二子承遜承諱陽生光

遠從約二子蒙蘊蒙生昌齡

案唐世系表作昌翰

滂字思齊

案唐世

系表作濟

三子峻字義山

案唐世系表作儀山

崇字爲山御史大夫太

子少保岫字德山

燉煌趙氏又曰張掖趙氏其先自天

水徙居隋鷹揚府郎將子遷生監察御史武蓋武蓋生彥

昭字與然相唐中宗

金城趙氏中山曲陽趙氏南陽穰

縣趙氏長平趙氏汲郡趙氏皆與天水同祖

華陰趙氏

五代江陵縣丞溥生孺祕書省正字孺生居晦居晦生瑩

字元暉晉宰相二子易則易從易則晉刑部郎中

蔡州

趙氏唐末淮安王德禪生疑及明德諱疑皆爲襄州節度

使明字贊堯荆南留後奔王建爲工部尚書以清白著名  
後漢蜀郡太守趙溫別部司馬趙瑾越騎校尉趙代漢陽  
太守趙博武威太守趙冲及子義陽亭侯愷並見西域羌  
傳酒泉龐涓母趙名娥復父讎州郡表其閭閻爲盛道妻  
同郡趙氏女字瑗姜西魏入柱國家一曰趙賁又賜清河  
公趙肅姓乙弗隋初復舊孫宏智事唐

蟠

古無蟠氏出于蟠牛之後而鄭公孫薑字子蟠考其世在  
蟠固前恐固乃薑孫以字爲氏

小王

晉大夫小王桃甲之後邵氏以小爲少誤矣

擾龍

元和姓纂曰劉累之後漢有侍御史擾龍羣又擾龍宗爲侍御詣董卓事不解劔卓搃殺之

趙陽

潛夫論衛公族趙陽氏公子趙陽之後也

三十一巧

倭

後漢劉永傳更始拜西防賊帥倭疆爲橫行將軍注曰倭音絞又曰周原伯倭之後見蓋延傳

絞

元和姓纂曰左傳有絞國在隨唐之南以國爲氏

鮑

出自姒姓夏諸侯國子孫氏焉裔孫叔牙相齊桓公名顯  
諸侯諡曰共曾孫牽曰鮑莊子國曰鮑文子國孫鮑牧皆  
齊卿牧之家臣曰差車鮑點其族仕晉者曰鮑癸漢元光  
七年鮑敞問雨雹及陰陽事於董仲舒見西京雜記其後  
鮑氏居東海剡縣鮑宣生永永生昱三世爲司隸校尉宣  
不屈王莽而死光武嘗令貴戚歛手以避二鮑卽永也

鮑俎

代北複姓



古今姓氏書辯證卷二十六

三十二皓

皦

蜀錄有皦氏出武落鍾離山黑穴中

浩

出自六國時浩生不害之後

抱

漢末有杞羌避董卓亂改姓抱北史有抱疑抱老壽皆其後姓纂以抱爲把末知孰是

老

左氏注云老佐戴公之子誤矣佐去戴公甚久非其子也



道

左傳楚大夫道朔其先以國爲氏謹按春秋齊桓公行霸有江黃道柏四國附之漢地理志有陽安縣應邵曰道國也今道亭是又顏師古注漢地理志汝南郡應邵曰陽安縣道國也弋陽黃國也今黃城是西平柏子國也今柏亭是安陽故江國也今江亭是

稻

謹按周官稻人掌稼下地者必以官氏

棗

晉幽州刺史王浚增棗嵩人呼爲棗郎唐藝文志有棗據集二卷棗嵩集二卷棗腆集二卷

政

音好未詳

案政乃古文好字廣韻集韻俱不言人姓正字通曰俞字變體爲政俞姓雖有表見者然一音

丑一音好聲亦不類今案字典有姐字女久切音紐姓也高麗人有之政疑卽姐氏之訛然廣韻載政而無姐今仍其舊

云

考

○案此條原本次稻氏後依廣韻移正

名世曰今汴都開封人有此姓

昊英

古天子昊英氏之後

浩生

元和姓纂曰以浩生不害爲複姓浩生氏

浩羊

風俗通齊大夫浩羊氏名嘉

老陽

周大夫老陽子之後

老萊

元和姓纂曰老萊子古賢人著書

考城

○案此條原本次浩羊氏後依廣韻移正

元和姓纂曰老城氏或爲考城氏今詳濟陽考城得非以城爲氏者或去土爲成乎

三十三哥

我

漢藝文志有我子一篇劉向云爲墨子之學

可

河南可氏後魏阿伏干可地干氏並改爲可氏北史可悉陵年十七從太武獵空手搏猛獸以獻後封暨陽子

嬰

姓書皆音烏可切姓纂無此氏謹按莊子有嬰荷世乃寓言非人姓姓纂削之是也

左

後漢鄧禹以左于爲軍師又左雄南陽溫人晉羅尙牙門將左汜後秦征東府寮左雅

可單

後漢可單氏後改爲河南單氏音單

可頻

後周書王雄之太原人或曰代人涇州總管庸國公西魏

賜姓可頻氏生諫

案後周書王雄本傳雄單名無之字生子謙此作諫亦誤

周益州總

管唐建中時有藍田尉可頻瑜

可達

世爲武昌人隨魏南徙後魏司徒可達安

可悉

後魏都幢將暨陽子可悉陵

左正

臨川季瑞卿言蜀人有賣卜者左正氏自云左正明之後  
又嘗見御史姓左者問其先正明家乎御史曰左與左正

本自兩氏因知蜀卜者果不妄姓書未有此氏今增入

左師

出自子姓宋子魚世爲左師以官爲氏

左史

元和姓纂曰古者左史記言因氏焉楚有左史倚相後以官爲氏

左行

春秋晉文公時先蔑將左行後以爲氏漢有御史左行恢  
左公

姓解曰左氏衛左公子洩誤矣左公子衛官洩其名後世  
或有左公氏亦非必洩後也

可地延

後魏可地延氏後改爲河南延氏

可朱渾

後魏并州刺史可朱渾買奴孝文明改爲朱氏望出河南

可足渾

後燕以新平公可足渾潭爲車騎大將軍尙書令

三十四果

瑱

唐史奚傳云開元二十年奚酋長李詩瑱高等以部落五千人降史思明傳云思明初走奚詭稱使者將還奚王令百人從入朝奚有部落瑱高者名聞國中思欲禽以贖罪

詠王曰從我者雖多無足與見天子者唯高材可與至中國王悅命將帳下三百與俱既至平盧殺其兵囚高以獻今詳瑣乃高之氏合增入

火拔

唐哥舒翰守潼關蕃將火拔歸仁以本軍隸麾下及潼關失守歸仁執翰以降賊

火尋

唐西域傳康居九姓一曰火尋

頗超

唐時党項以姓別爲部有頗超氏事具去聲六至利字

三十五馬



馬

出自嬴姓伯益之後趙王子趙奢爲惠文王將有功賜爵  
爲馬服君馬服者言能服馭馬也奢生牧亦爲趙將子孫  
以馬服爲氏世居邯鄲秦滅趙牧子興徙咸陽秦封武安  
侯三子珪琛嵩生述字正惠漢太子傅平通侯生權爲  
寧東將軍三子何羅通倫通字達黃門侍郎重合侯坐何  
羅反徙扶風茂陵成懽里生賓議郎繡衣使者三子慶昌  
襄昌生仲元武司馬四子沉余援員援伏波將軍也余字  
聖柳○案唐世系表作卿中壘校尉揚州牧二子嚴敷嚴後漢將作  
大匠七子固伉歆鮪融留績融字季長二女論芝皆有才  
藝歆十一世孫默生岫默後魏雍州侍中生思歡岫字子

岳生喬卿梁襄州主簿喬卿生君才右武衛大將軍南陽  
公生萬歲令珉均州刺史懿珉生季龍嵐州刺史大同使  
三子炬炫燧燧字洵美相唐德宗位司徒生太僕少卿彙  
少府監暢彙生赦敷皆叅軍暢生繼祖殿中少監扶風

馬氏唐有曠生植字存之相宣宗生郁郁生儔字後已

博州在平馬氏齊有在平令暹因家焉暹生周

○案唐世系表暹生

瑗瑗生周此作暹生周似有脫誤

相大宗生

○案此下當有載字

恂載尙書左丞吏

部侍郎生觀觀觀吏部郎中生元振元極

○案唐世系表作拯

恂河

南尹丹州刺史又後漢騎都尉賢擊零昌有功封都鄉侯

賢孫光以賢及二子死羌兵封舞陽亭侯又張掖太守續

領護羌校尉又護羌從事元後蜀李壽以馬當爲股肱坐

勸立太弟夷三族後涼呂光有中田校尉馬遂又門下侍郎馬權以讒被誅南涼馬輔爲中州之令族北燕有吏部尙書廣宗公馬弗勤

堵

○案此條及下冶氏假氏三條原本次夏氏後依廣韻移正

出自鄭大夫食邑於堵因以爲氏鄭文公時有堵叔爲政謂之三良又有堵俞彌堵女父堵狗皆爲鄭臣春秋音義音者正合入此韻

冶

其先周官冶氏掌爲兵器以世官爲氏衛大夫冶廙魯大夫冶區夫

假

見姓苑漢有陳留假倉字子驕治尚書受學於平陵張山拊官至膠東相騎都尉尚書有假氏學

賈

出自姬姓晉唐叔虞少子公明周康王封之於賈爲附庸謂之賈伯河東臨汾縣賈鄉卽其地也曲沃武公取晉并賈國以其子孫爲大夫其族仕諸侯者陳有賈獲齊有賈寅至漢長沙王太傅賈誼洛陽人生璠尚書中兵郎二子嘉暉嘉宜春太守最好學有名生夔游擊將軍五子洪潤汭湘注汭輕騎將軍生曄下邳太守二子冰淵冰遼東太守三子納邠丕生沂

案唐世系表沂作昕○案汲古閣本新唐書作沂

祕書監

二子廷玉季玉季玉武威太守肅侯生機駙馬都尉關內

侯

案唐世系表秀王武威太守生衍兖州刺史衍生襲輕騎將軍徙居武威二子綵詡詡後魏太尉肅侯生璣駙

馬都尉此作秀王璣中有脫誤

又徒長樂二子通延通車騎大將軍三

子仲安仲謀仲遠

案唐世系表作仲達

仲遠潁川太守生正字彥

度輕車將軍雍州刺史酒泉郡公二子父康康祕書監二

子錯鈞鈞生弼散騎侍郎二子躬之匪之躬之四子希鑑

希遠希逸希叟希鑑生稅義興太守稅

案唐世系表作稅

生執梁

太府卿精世譜學撰姓氏英賢傳二子暹肇肇二子寰宏

宏後梁中軍長史生勰北齊青兗二州刺史河東公子皞

案唐世系表作嶠

嶠嶠殿中少監三子懿懋憲憲字元楷後周祕

書監葛榮之難避地浮陽生處靜處澄處靜生敬言滑州

刺史敬言生令思禮部員外郎令思曾孫耽字敦詩相唐

德宗

案唐世系表敬言子遠則遠則生知義知義生元炎元炎生耽相德宗據此則耽乃敬言玄孫遠則之曾

孫此作令思會孫與唐表不合

子孫居樂陵又樂陵賈氏有至曾父子世

掌誥命至在先天時草睿宗傳位詔曾又草明皇冊肅宗  
詔天子美之曾爲黃門侍郎平陽公至爲黃門侍郎晉國  
公至生係衡州刺史係生種司門員外郎種生昶太子司  
議郎昶生琛河南密令琛生翊常州刺史兼鹽鐵使江淮  
留後翊生潭字孟澤南唐檢校司徒泰州刺史洛陽宣子  
三子彬穆修彬爲朝散大夫大理司直穆爲秦州司倉叅  
軍 河南賈氏世居姑臧胄生寧寧生餗字子美相文宗  
後漢侍御史賈昌使日南北地太守賈福擊羌不利西京  
雜記戚夫人侍兒賈佩蘭言宮中事甚詳晉東夷護督賈

夏

沉迎立扶餘王子卒復其國後涼呂光討西域以武威太守賈虔爲軍佐後燕慕容永將賈韜後秦章武太守賈堅  
姓書皆曰姒姓夏王之後誤矣夏非國氏與齊秦正同謹  
按春秋出自嬀姓陳宣公庶子西字子夏別其族爲少西  
氏生御叔御叔娶鄭宣公子貉之妹生徵舒字南始以王  
父字爲夏氏而其母謂之夏姬魯宣公九年徵舒弑靈公  
十一年楚莊王討夏氏亂轅徵舒於栗門因滅陳爲縣威  
申叔時諫乃復封之鄉取一人以歸謂之夏州而徵舒三  
世孫夏齧四世孫夏區夫皆仕陳爲大夫裔孫夏禦寇亦  
仕齊爲大夫漢有司徒夏勤後漢交趾太守夏方九江人

降蠻有功晉有會稽人夏統字仲御唐大厯中有太常博士夏珪堂後官嘉州長史夏德崇

也

蕃姓今秦隴間有之望出趙郡

馬適

漢功臣表有畢侯馬適育又昭紀元鳳元年武都氏人反遣執金吾馬適建擊之師古

○案師古下當有注字或曰字

姓馬適名建

然則建必育之後也

馬矢

漢二十八將有馬宮本姓馬矢氏後改爲馬氏

馬服



出自趙奢封馬服君子孫氏焉後漢注曰馬服者言能服  
馭馬也

馬師

出自姬姓鄭穆公會孫羽頡爲鄭馬師始以官氏謂之馬  
師頡

耆舌

○案此條原本欠蛇  
蛭氏後依廣韻移正

世本曰康居國人朝後魏因留中國

野利

唐党項傳慶州有破丑氏族三野利氏族五把利氏族一  
與吐蕃姻援擾邊十年代宗用郭子儀計遣使招慰於是  
破丑野利把利三部皆入朝芳池州野利部並徙綏延州

大歷末野利禿羅都與吐蕃叛子儀擊斬之而野利景庭  
野利剛以其部入附雞子川又有六州部落曰野利越詩  
其後世事夏國李元昊將野利遇乞善用兵元昊分山界  
戰士之半付之中國尤苦邊患慶歷中种世衡用間殺遇  
乞元昊遂衰

### 野詩

唐鳳翔將野詩良輔以名雄邊朝廷遣使至吐蕃虜輒言  
唐家稱和好豈妄邪不爾安得任良輔爲隴州刺史

### 野頭

宇文士及之先姓野頭氏後改賜焉

### 野辭

唐時党項以姓別爲部有野辭氏

虵蛭

作野啞

○案作字上當有脫文

後魏虜姓

賈孫

姓苑曰衛有王孫賈出自周王之後其孫自以去王室遠改爲賈孫氏漢侍中有賈孫強

夏侯

漢太僕汝陰侯嬰裔孫唐駕部郎中審封生孜字好學相宣宗懿宗又漢太子太傅勝家居長安號長安夏侯氏南史夏侯亶夏侯夔繼爲豫州刺史並有恩惠於鄉里百姓歌曰我之有州頻得夏侯前兄後弟布政優優

夏父

出自曹姓邾婁顏公之子曰夏父與魯孝公同時以國授其弟盱盱請分國而治則六分之而受其一國人稱焉其後以王父字爲氏魯文公時有夏父展宋有大夫夏父社

夏丁

出自衛大夫太叔悼子之甥曰夏戊其祖字丁以王父字爲夏丁氏戊生期爲衛司徒

夏陽

晉大夫夏陽說其先以所食邑爲氏

夏里

元和姓纂曰漢四皓夏里黃公河內軹人

古今姓氏書辨證卷二十六  
社南

姓苑云扶風安陵有社南氏社北氏風俗通曰齊倡

○案原本

作昌据通志氏族略引風俗通改下條倣此

徙居社南因以爲氏

社北

風俗通曰齊倡徙居社南因以爲氏又有居社北者亦以爲氏漢高煬娶扶風社北氏女

古今姓氏書辨證卷二十六終

古今姓氏書辯證卷二十七

三十六養

養

楚大夫食邑於養因以爲氏

蔣

周公第三子伯齡封蔣子孫氏焉因在汝南期思縣宋改

爲樂安漢有蔣詡蔣郎樂安今光州遷居縣也宋有蔣

恭義興詡十代孫休自樂安徙義興陽羨縣十一代孫

元遜陳左衛將軍堂姪曾孫儼唐蒲州刺史生安遇郢州

刺史儼再從姪岑膳部員外司農少卿生晁兼御史岑堂

弟勵已生至著作卽儼五從

案五從下有脫字

挺主爵郎中國子

司業生列媛深列尙書左丞生先諫光祿少卿鎮工部侍

郎媛禮部尙書東都留守生鉢

案唐世系表將明父瓌此作鉢不符

起居舍

人國子司業生將明生父

案原本脫父据唐世系表補

太常少卿並元

遜之族也父生係伸佶偕係檢校左僕射興元節度中書

侍郎華州刺史

案唐史伸相懿宗此中書侍郎上疑脫去伸字

生泳佶國子祭酒

東萊膠東狀稱魏太尉蔣濟之後唐吏部侍郎大理卿

蔣欽緒生洩演漾溢溶沅清洩鳳州刺史生郁邵演兵部

員外生邳鄆邳殿中丞御史鄆大理評事漾咸陽令溢長

安丞生邳郿溶奉先令安州刺史生郾

案唐蔣欽緒傳以郾爲清孫與此

異沅刑部侍郎大理卿生邳兼監察御史清鞏縣尉兄子

郿繼施州刺史緒堂姪溥

鞅

出晉卿趙鞅之後

疆

疆氏依千姓編移入上聲

罔

宋景德四年西夏趙德明母罔氏卒起復鎮軍大將軍十月葬罔氏命閤門祇候袁禹爲弔祭使

放

上聲

尙書堯臣放齊之後

驪

姓苑曰呼朗切今涇州有之



養由

元和姓纂曰楚養由基之後謹按春秋楚人謂由基爲養叔蓋單姓養氏豈後人別爲複姓乎

爽鳩

○案此條原本次長孫氏後依廣韻移正

元和姓纂曰少皞氏司寇曰爽鳩氏封爲諸侯居齊地以地爲氏

長孫

出自拓拔氏鬱律生二子長曰沙莫雄次曰什翼健什翼健卽魏道武皇帝祖也後魏法七分其國人以兄弟分統之沙莫雄爲南部大人後改名仁爲拓拔氏生嵩太尉柱國大將軍北平宣王道武以嵩宗室之長改爲長孫氏至

孝文以獻帝長兄爲紇骨氏次兄普氏爲周氏又次兄爲

達奚氏又次兄爲伊婁氏又次兄敦正氏

案魏志作正敦氏此誤○案唐

世系表亦作敦正

爲正氏又次兄俟氏爲万俟氏

案魏志俟氏後改爲亥氏此不

合叔父之後乙旃氏爲叔孫氏疏屬車焜氏爲車氏是爲

十姓太和中詔自代北而徙者皆爲洛陽河南人嵩三子

泰同敦泰征南將軍都督中外諸軍事生大將軍延年延

年生陝州刺史鄆國公儉儉生相州刺史昌寧侯

○案唐世系表

公平二子道生道開道生太尉上黨靖王三子旃

案魏書旃作抗

此作旃與唐世系表及元和姓纂同惟與本傳不合○案北史旃作旃

太一德一旃司空上

黨康王

○案魏書抗位少卿早卒北史旃與魏書同此作司空上黨康王不合

生觀司徒上

黨定王生稚澄稚字幼卿西魏尙書令太師上黨文宣王

二子子裕子彥子裕右武衛將軍

案魏書及北史俱云子裕位衛尉少卿與此

異平原公二子紹遠兕紹遠字師西魏大司空河中獻公

案魏書稚凡五子子彥子裕紹遠士亮季亮以紹遠爲子裕子與唐書長孫皇后傳及世系表俱同惟與本傳不合

○案魏書及北史俱以紹遠士亮季亮爲稚後妻虞氏所出而北史又以士亮爲稚弟澄字殆不可解

生覽

字休因後周大司徒薛公姓書曰稚爲大師孫紹遠爲大司空遠子覽爲大司徒三世三公覽生洪寬龕操操唐金部郎中樂壽安男生憲誼鑒詮詮尙衣奉御駙馬都尉少卿平安男熾隋戶部尙書饒陽公晟字季成隋淮陽太守齊獻公五子

○案北史晟長子行布次子恒安是晟不止五子

無乃唐左監門衛

軍清都郡公無傲昌寧郡公無憲兵部尙書薛國公無忌字輔機相太宗高宗太尉趙國公無逸雲麾將軍郢縣公

無忌十二子冲祕書監駙馬渙鴻臚少卿上黨郡公濬常  
州刺史安康伯淹長水令安城縣公溫尙衣直長澹太子  
洗馬淨尙衣奉御澈成州刺史津尙衣奉御澤左千牛衛  
長史潤太常少卿金城縣子冲生延通事舍人延生宣州  
刺史元翼元翼生寧州刺史陳留縣公訓訓生福昌尉釗  
釗生三子守正守英守廉守正鴻臚卿生全緒寧州刺史  
全緒生燧涇原營田判官試太子通事舍人慥邠州刺史  
燧生紹先恭先孝先雅先慥生疑汭

三十七蕩

蕩

出自子姓宋桓公御說生公子蕩蕩生公孫壽壽生意諸

世爲司城意諸以王父字爲蕩氏其後有蕩虺爲宋大夫而魯女伯姬嫁爲蕩氏婦

盪

集韻曰人姓音儻

莽

前漢反者馬何羅後漢明德馬后耻與同宗改爲莽氏

党

音黨

後秦將軍党刪又姚興將党志隆以東鄉降大夏赫連勃勃用爲光祿勳

蕭

案廣韻三十七蕩無蕭字原本次三十六養黠氏後今依原音盧黨切附蕩韻

盧黨切今辰沅州蠻種有此氏謂之蕭溪蠻

廣武

出自趙廣武君李左車之後氏焉廣韻曰何氏姓苑陳餘封廣武君後爲氏誤餘乃成安君以不用廣武君計敗死泚水之上韓信得廣武君而師事之

三十八梗

丙

齊大夫邴歆後去邑爲丙氏又李陵裔孫自匈奴歸魏見於丙殿賜姓丙氏

邴

出自齊大夫食采於邴以邑爲氏春秋時有邴歆邴夏邴師邴意茲其族仕晉者曰邴豫邴師仕魯者有邴洩元和

古今姓氏書辨正卷二十一  
五  
姓纂以爲晉邴豫食采而得氏廣韻以邴音柄而引去聲  
皆誤矣

景

出自姜姓齊景公之後以諡爲氏景丑景春皆其裔也戰  
國時景氏世爲楚相景翠景鯉景舍尤其顯者後有景差  
能賦或云楚之公族別爲景氏漢高紀東陽人立景駒爲  
楚王文穎注曰楚族景氏駒名高帝九年徙齊楚大族景  
氏昭氏屈氏田氏懷氏五姓關中與利田宅好時華陽諸  
景是也後漢大將軍櫟陽侯景丹居馮翊櫟陽侍郎景勃  
居蜀郡後漢廣漢人景毅爲越巂太守有仁恩南涼有太  
史令安亭侯保

省

左傳宋大夫有省臧

杏

出姓苑

梗陽

晉大夫食采梗陽其後氏焉

邴意

元和姓纂曰齊大夫邴意茲之後望出千乘博昌

三十九耿

耿

出自姬姓侯伯之國其地平陽皮氏縣東南耿鄉是也商



王祖乙嘗圯于耿卽其所都春秋魯閔公二年晉獻公滅耿以封趙夙耿國子孫奔楚爲大夫以國爲氏耿之不比

是也

案晉獻公滅耿傳在閔公元年非二年也且莊公二十八年荆伐鄭傳已有耿之不比爲旆語是不比之

仕楚在滅耿之先矣今觀此文義似不比於滅耿之後然後奔楚爲大夫疑屬附會後漢遼東太守

耿夔斬句驪渠歸功曹耿耗戰沒元菟太守耿臨破句驪

又謁者耿譚破羌京兆虎牙都尉溥漢陽太守种受羌降

騎都尉秋擊羌東觀記嵩履清高之節齒童介然特立不

隨俗漢鉅鹿耿氏武帝時以吏二千石徙扶風茂陵上

谷太守牟平烈侯況字俠游六子弇舒國廣舉霸弇字伯

昭建威大將軍好時愍侯子忠騎都尉忠子馮馮子侍中

良一名無禁良子協皆嗣侯舒伏胡將軍牟平侯生襲

襲生大將軍寶皆嗣侯寶生侍中牟平侯箕陽亭侯常寶  
弟子承羽林郎將林慮侯霸喻康侯生文金文金生喜喜  
生顯爲羽林左監顯生河陽太守援皆嗣侯援字伯緒其  
孫宏猶襲爵廣舉中郎將國字叔慮大司馬二子秉襲字  
伯初光祿勳美陽威侯子漢陽太守冲嗣秉曾孫紀爲少  
府襲字定公度遼將軍栗邑侯中郎將廣子恭字伯崇  
長水校尉子溥京兆虎牙都尉生宏字季遇度遼將軍耿  
氏自中興已後迄建安之末大將軍二人將軍九人卿十  
三人尙公主三人列侯十九人中郎將護羌校尉刺史二  
千石數十百人蓋與漢興衰云東郡太守東光成侯純父  
鉅鹿宋子人艾爲王莽濟平尹生東郡太守東光成侯純

字伯山子莒鄉侯阜生盱及騰並封高亭侯騰子忠忠孫緒皆嗣侯純三弟植輔威將軍武邑侯宿代郡太守遂鄉侯訊赤眉將軍著武侯凡宗族封列侯者四人關內侯三人爲二千石者九人唐大厯拾遺耿漳徙居河東江淮異人錄有女冠耿先生善黃白術事南唐晉有成都內史耿騰後京軍司馬耿稚

幸

後漢幸子豹破蠻以功爲朱崖太守晉方技傳幸靈唐幸南容並洪州人望出南昌

四十靜

頤

謹按潁鄭地也鄭大夫考叔爲潁谷封人因以爲氏後漢  
陳留長安人潁容字子嚴撰春秋釋例至今望出陳留宋  
著作佐郎潁贄策中賢良方正科遷太子中允

領

程氏世譜宋新安郡丞艾亭侯程法曉娶吳郡領氏謹按  
領氏未詳所出

井

虞大夫食邑于井謂之井伯後爲氏漢扶風郿人井丹字  
大春以文學知名所謂五經紛綸井大春者廣韻以井氏  
爲姜子牙之後未知何據後京有臨松令井祥

省

出姓施

涓

左傳齊大夫涓竈之後

井強六斤

代北四字姓

古今姓氏書辨證卷二十七終

古今姓氏書辯證卷二十八

四十三等

崩

穆天子傳崩伯綮之後崩國在虞芮之間

○案崩字當作

崩成侯索隱音苦壤切漢書作鄒師古音陪又普肯反今穆天子傳正作鄒郭璞亦音普肯反說文鄒右扶風鄠鄉丁度集韻始合鄒鄒二形爲崩鄒氏亦承其誤

四十四有

友

梁冀美人友通期謹按此舊書未有豈吳氏誤以友爲支

識者更詳辯之

案東觀漢記友通期一作支通期

柳

柳謹按禮記衛太史柳莊衛君稱爲社稷之臣又衛人柳若問子思爲出母父自爲展禽之後

鈕

東晉有吳興鈕滔宋開封鈕氏大理寺丞約生裴建中裴宣德郎生定國生昌言政和五年上舍建中左班殿直生太常博士華國

雀

久音

百濟人姓

醜

後漢袁紹傳有醜良

○案通志氏族略與此同袁紹傳有醜良文醜無醜良疑誤

舅

晉大夫狐偃字子犯文公重耳之舅子孫或氏焉

曰

春秋時宋華氏家曰任之後

有扈

史記曰禹之先姁姓其後分封以國爲氏故有有扈氏

有巢

古帝者有巢氏後

有窮

謹按春秋傳昔夏之衰后羿自鉏遷於窮石號有窮氏子孫或以爲姓

有男



史記曰禹之先姁姓其後分封以國爲姓故有有男氏

有鬲

夏諸侯以國爲氏少康之臣靡嘗奔焉自其國收二國之  
燼以滅寒浞

有偃

元和姓纂曰皐陶偃姓之後有偃子皐爲晉士官

右師

謹按後漢包咸師事博士右師細君則右師氏宜收而姓  
書未有今增入春秋時宋有左師右師皆國相而華元爲  
右師以官爲氏細君蓋其後也

右宰

謹按春秋衛國之官有右宰其世官者氏焉衛大夫右宰醜蒧殺州吁其孫右宰穀自三狐裘羔袖者

右公

衛右公子職之後以官爲右公氏

右行

姓解曰晉賈華爲右行其後氏焉漢有御史中丞右行綽謹按春秋賈華者晉太子申生之屬也輿大夫也其後晉文公作三行以禦戎屠擊將右行亦或爲氏晉大夫右行詭右行辛皆以氏見者也邵氏唯此一說稍有據今兩存之

右扈

出姓苑

醜門

西秦錄有下將軍醜門弟子

曰季

元和姓纂曰齊公子曰季宣孟誤矣謹按二人春秋時皆晉大夫曰季胥臣也宣孟趙盾也胥臣字季食邑於臼謂之曰季爲晉司空謂之司空季子詳此卽世有曰季氏必胥臣之後爲氏然未必有也

受西

○案此條原本次壽西氏後依廣韻移正

姓解曰後魏書有受西氏

壽西

謹按漢紀昭帝元鳳元年冬十月詔曰燕王遣壽西長孫縱之等賂遺長公主丁外人云云蘇林曰壽西姓也長名也孫姓縱之名未知林果何據如無所據必孫縱之爲壽西長或壽西人姓長孫名縱之者也

案長孫之氏後魏獻帝時以拓跋氏改焉

始有此氏漢時不應有此名世此案似未可據

## 四十五厚

厚

出自姬姓魯孝公八世孫瘠食采於厚謂之厚成叔因氏焉厚與邱通

後

五代漢隱帝嬖臣後贊今夷門多此姓

后

○案此條原本次郈氏後依廣韻移正

出自共工氏之子曰句龍爲后土自三代以來祀爲社神子孫以后爲氏越大夫后庸孔子弟子后處字子里

郈

○案此條原本次荀氏後依廣韻移正

郈於春秋爲魯叔孫氏邑陪臣食焉者爲氏郈成叔瘠郈魴假是也

糾

斗音

音天口切

案通鑑糾他口徒口切十國紀年吳越有糾沿急就篇糾氏見姓苑

苟

出自黃帝子得姓者十四人其一曰苟

案顏師古注苟氏一曰本晉大夫苟

氏之  
改爲苟氏  
邈難

戰國時苟變可將五百乘子思薦於衛侯秦

州刺史苟池望出隴西後魏代北若干氏改爲苟氏望出  
河南近世有避廟諱從其偏旁爲苟氏誤矣廟諱偏旁乃  
苟字紀力反乃轉爲苟且之苟於姓氏本源失之愈遠程  
氏世譜云以河內地多苟杞氏曰苟誤矣胥臣無是語也

厚正

出姓苑

牡正

姓苑有鉅鹿太守牡正勝謹按其先食邑牡正故以爲氏  
四十七寢

沈

古字作郊出自姬姓春秋魯成公八年爲晉所滅

案左傳定公四

年蔡公孫姓師師滅沈以沈子嘉歸傳稱晉使滅之則事在定公四年此作成公八年恐誤

沈子逞字

循之奔楚遂爲沈氏生嘉字惟良二子尹丙尹戊尹戊字

仲達隱於靈山爲楚左司馬生諸梁字子高及後臧子高

以爲左司馬食采於葉號葉公生二子尹射尹文尹射字

修文爲楚令尹旬日亡去隱於華山二子尹朱尹赤尹赤

字明禪生郢字文明召爲丞相不就生平字俊之封竹邑

侯生遂字佐時秦博士生侔字文甫左庶長竹邑侯生遵

字伯吾漢齊王太傅敷德侯徙居九江壽春二子盛達

案

唐世系表

達字伯宏驃騎將軍生乾字仲元尙書令生承

承字元良南陽太守彭城侯生助

案唐世系表承作泓助作昂

字子衡

揚武校尉鎮軍

案唐世系表此下當有將軍二字

三子嵩奮奉奮字仲異

御史中丞生格字仲悌將作大匠格生謙字文公御史中

丞謙生靜

○案唐世系表作靖

字文光濟陰太守避王莽之亂隱居

桐柏三子勲戎臺戎字威卿後漢光祿勲以九江從事說降劇賊尹良漢光武封爲海昏侯辭不就因避地徙居會稽烏程縣之餘不鄉遂家焉順帝永建元年分會稽爲吳郡靈帝初平五年分烏程爲永安縣孫皓寶鼎二年分吳郡爲吳興郡晉太康三年改永安爲武康卽爲郡人戎四子酆懿齊恭酆字聖通零陵太守四子許仲高景景河間相生彥彥裔孫君亮相武后其曾孫超生嵩字文甫

暉

音審

後漢武落山黑穴中出四姓暉氏相氏樊氏鄭氏事見巴



氏說

廩丘

齊大夫廩丘子其先以所食邑爲氏英賢傳齊有隱者廩

丘充

四十八感

禪

出姓苑

譚

徒感切姓苑曰吳人

湍

奴感乃感二切水經曰湍水出西河美稷縣東南流東觀

記羌人因水以氏之漢沖帝時羌湍狐奴歸化蓋其渠帥也潘安仁關中詩曰虛鼎湍德德乃狐奴之後

咎

子感切

晉載記李驤子壽追尊母咎氏爲皇太后又有前將軍咎

堅卽后族也後魏官氏志代北複姓外盧氏改爲咎氏

案

今官氏志無此文

望出太原及彭城吐蕃大酋咎插武后長壽元

年四月吐蕃別部酋長咎捶帥羌蠻八百餘人內附宋博

州高唐咎氏居潤宣徽北院使東京副留守判開封府檢

校太尉左領軍衛上將軍義成軍節度使贈太師有傳生

惟質至內園使惟質孫建中三班借職居潤弟居濟水部

員外郎

川都咸切

姓苑有月氏

四十九敢

欖

余靖安道作屯田郎中黃府君碑云母欖氏累封真陽曲江南陽縣太君謹按姓書未有此氏今增入

噉

徒感切前秦錄有將軍噉鐵噉與啖通

○案此條原本繫覽氏下文與標題

略不相涉蓋本是噉氏條注文編大典者誤入覽下耳今依文則列噉氏繫文于下而刪覽氏

啖

舊姓書音上聲集韻音淡今從集韻秦王苻堅有秦州刺

史啖鐵本武都氏又氏啖青廢抱罕帥衛平迎立苻登者  
乃鐵之祖也唐潤州丹陽簿啖助治春秋謂之啖先生大  
厯中水部郎中啖彥珍河東人

五十炎

冉

元和姓纂曰大夫叔山冉之後按此本無明據而周文王  
子封於聃太史公省聃爲冉則冉出於聃最爲有理今宜  
曰魯國冉氏出自姬姓周文王子聃季載以國爲氏後人  
去耳爲冉氏春秋時冉爲魯大夫唐初有開州首領冉肇  
則又有夔州首領冉種

染

按史記染姓亦作冉字畫之變也

音

○案此條原本次奄氏後依廣韻移正

音閃蕃姓也

○案此下當有脫文

今詳三姓正當爲一姓以傳寫字

畫之誤遂成三字

○案廣韻負質二字俱音閃蕃姓無音字

奄

風俗通周成王旣伐奄其子孫以國爲氏元和姓纂曰秦大夫奄息誤矣息姓子車氏

多姐

○案廣韻五十炎無多字今依原音先冉反收入

漢馮奉世傳永光三年秋隴西多姐旁種反師古曰多音所廉反又先廉反姐音紫今西羌尙有此姓音先冉反

五十三嫌

減

音咸漢有減宣急就章有減罷軍師古注漢志曰減姓也  
音減省之減宜爲中丞本字作咸

五十四檻

橄

音檻元和姓纂曰胡感切今河內懷州多此氏

五十五范

范

出自祁姓帝堯之後爲陶唐氏裔孫劉累學擾龍以事夏  
王孔甲賜氏曰御龍以更彭姓豕韋之後劉累遷於魯縣  
至商爲豕韋氏與大彭更伯諸侯商末國於唐周成王滅

唐以封太叔徙封唐氏於杜京兆杜縣是也杜伯事周宣王無罪見殺其子奔晉生薦字子興爲晉士師以官爲氏士薦生成伯缺缺生武子會爲晉上卿佐文公襄公尊事天子爲諸侯盟主又滅赤狄有功王賜之黻冕使爲晉太傅食邑於范因氏焉謂之范武子其地濮州范縣是也武子生范文子變變生宣子范勾勾生獻子范鞅字叔鞅生昭子及臯夷昭子名吉射臯夷側室子也又戎御大夫范無恤智伯滅范氏范氏子孫出奔他國三卿分晉范氏歸事魏魏相范痤卽其後魏范雎避魏齊之難變姓名爲張祿先生入秦爲丞相應侯越相范蠡功成泛扁舟游五湖變姓名爲鴟夷子陶朱公皆名重諸侯後漢司隸校尉滂

字孟博汝南人後徙居河內裔孫履冰爲唐宰相漢金鄉侯范式後居山陽博士升叔之後居代郡南鄉舞陰范氏晉離州刺史晷生穉堅堅護軍長史生啟黃門侍郎穉生汪晉安北將軍徐爰二州刺史二子康嗣爵寧字武子晉豫章太守注春秋穀梁傳者寧二子泰宋車騎將軍宏之餘杭令武興侯泰二子晏宋侍中曄宋左衛將軍太子詹事謀反伏誅汪曾孫璩之宋中書侍郎生抗郢府叅軍抗生雲梁侍中卽明友後唐職方郎中季明又自燉煌徙懷州又晉范宣陳留人范粲外黃人謹按左傳楚大夫范山勸王收北方必子孫之奔他國者後秦洗馬范勗後蜀李雄以西方范長生巖居穴處求道養志將以國讓之長生



古今姓氏書辨證卷二十八終  
不受拜丞相尊曰范賢又加天地太師西山侯

范師

姓解曰姓苑有范師利方

古今姓氏書辯證卷二十九

去聲

一送

貢

琅邪贛遂耆老大儒教授數萬人爲太守門下掾拜起舒遲太守朱博出教主簿曰贛老生不習吏禮主簿且教拜起閑習乃止博不喜諸生故也贛與貢同

弄

姓解曰吐蕃王姓唐太宗嘗以公主妻弄贛

棟

○案此條原本次仲氏後依廣韻移正

出姓苑

痛

周穆王有嬖寵盛姬早死穆王哀之不已加禮葬之改其族爲痛氏

仲

出自子姓宋莊公子城字仲子生公孫師師生江爲宋司馬以王父字爲仲氏所謂司馬仲江者江生幾字子然爲元公左師生佗字子服其族居衛者曰由字子路爲孔子弟子裔居樂安及中山後漢右扶風仲光擊零昌唐王璠傳有學士仲無頗又魯東門氏被逐立襄仲之子嬰齊爲仲氏其後無聞元和姓纂曰高辛氏才子仲熊仲堪之後爲氏又仲虺爲湯左相其子孫氏焉二說皆誤蓋附會之

過也宋兵部侍郎天章閣待制仲簡字畏之揚州江都人  
洞沐

元和姓纂曰漢有洞沐孟陽治易

仲孫

出自姬姓魯桓公四子長子莊公同次曰慶父次叔牙次  
季友慶父卒諡共仲生穆伯公孫敖敖生文伯穀惠叔難  
穀生孟獻子蔑始以仲孫爲氏蔑生莊子仲孫速速生孝  
伯仲孫羯羯生僖子仲孫矍矍生懿子仲孫何忌何忌生  
武伯洩一名彘自敖至彘皆爲魯卿與叔孫氏季孫氏掌  
國政謂之三家

仲叔

衛大夫仲叔于奚其先以王父字爲氏于奚以救孫良夫  
功爲新築大夫賜曲垂之樂繁纓以朝裔孫圉爲靈公大  
夫能治賓客

仲熊

元和姓纂曰楚公族有仲熊氏謹按楚出自鬻熊之後其  
君臣以熊冠其名蓋姓芊而氏熊也故同姓之國亦有熊  
姓其臣亦以熊氏則熊氏卽熊姓之別有字仲者宜爲仲  
熊氏不然八愷仲熊之後亦宜有爲氏者焉

仲顏

元和姓纂曰魯有大夫仲顏莊叔齊有大夫仲顏據謹按  
魯大夫二人一曰公巫召伯仲一曰顏莊叔今姓纂所取

是以公巫召伯與仲顏莊叔爲二人其說亦可據

仲行

元和姓纂曰左傳秦三良仲行之後是也又云世本有仲行寅晉大夫有仲行氏誤矣春秋時秦仲行子車氏之子也中行寅荀氏之後也古字中與仲雖通用然晉之中行氏於官本對左右而爲中秦之仲行氏於字本對伯季而爲仲不可強合

二宋

宋

漢郊祀志有燕人宋無忌爲秦始皇作仙方者其後有楚懷王上將軍義封武信君生漢中尉衛將軍壯武侯昌始

居西河介休十二世孫晃晃三子恭恭弟畿生榮國榮國

曾孫丹後魏吏部尙書利人侯

○案唐世系表作子

生紀字仲烈紀

生欽道北齊黃門侍郎生元節定州田曹元節生宏竣大

理丞宏竣生櫟陽令務本務本生衛州司戶參軍元撫元

撫生璟相明皇善守文以持天下之正不求邊功天下謂

之姚宋而剛正又過於崇又有廣平宋素生叔夜叔夜生

申錫字慶臣相文宗生球慎微球生珣

○案唐世系表作珣

前秦寧

朔將軍宋方後燕宋赤眉殺司空慕容宙反伏誅前燕慕

容廐以西河宋奭爲股肱又有右僕射宋活平原宋該居

樞要位黃門侍郎宋回揚武將軍南涼涼州人宋鍾爲姚

弼內應誅又材官將軍宋益

統萬

亦作吐萬代北人氏後改爲萬氏

三用

雍

出自姑姓黃帝之後與南燕同祖商周之間有食采於雍者因以爲氏春秋時宋雍糾爲鄭祭仲贅壻其族雍廩爲齊大夫至漢有雍齒封什邡侯自漢以來州名人氏皆音於用切唯楊億談苑云當作平聲乃音訛而爲去聲也謹按姓書皆曰雍氏出自姬姓周文王子雍伯之後以國爲氏考其實不然春秋傳曰宋雍氏女於鄭莊公曰雍姑又云宋雍氏有寵於宋莊公杜氏注云雍氏姑姓宋大夫當



時宋大夫以女嫁諸侯如華子雍姑皆兼稱姓氏蓋宋二王之後國大而史籍全備故記注無闕然則雍氏不出周文王而出於黃帝不音去聲而音平聲無可疑者今從左氏及談苑爲正

雍門

世本齊頃公生子夏勝以所居爲雍門氏謹按春秋雍門齊城門所謂焚雍門之萩也戰國策齊雍門周以琴干孟嘗君

○案雍門子周鼓琴事見說苑而此書及廣韻通志等皆引戰國策今國策無此文疑逸去

說苑

齊有雍門子狄

四絳

絳

元和姓纂曰絳縣老人之後邵氏解曰絳侯周勃之後

五寘

被

呂氏春秋晉有大夫被瞻風俗通漢有大夫被通牂牁太守被條邵氏引古今人表曰王倪之師被衣被音披誤矣被衣非人且不音披乃莊子寓言不必引爲瞻通條三人之祖邵氏援古每不精詳如此類皆合駁正

智

出自荀氏林父之弟荀首食邑於知謂之知莊子以邑爲氏生武子知嚶嚶生知朔知盈朔早死盈字伯夙爲卿是爲知悼子生文子知躒躒生文子荀瑤號知伯

○按此文有脫簡史

記索隱引世本云櫟生  
宜子申申生智伯瑤

又知起知徐吾皆其族瑤貪而愎

爲韓魏趙所滅知氏遂亡其存者唯輔氏知亦作智

義渠

風俗通義渠狄國爲秦所滅因氏焉漢有光祿大夫義渠  
安國宣帝時使行覘諸羌

六至

摯

魏有摯仲治對曲水事者晉史曰虞字仲治

遂

漢綏和元年丞相司直琅邪遂義子貢爲左馮翊此遂氏  
名義而字子貢者

祕

漢表戴恭侯祕彭祖以擊陳豨功侯千一百戶生共侯憚

憚生夷侯安安

案漢書安作安國此脫國字

生安侯軫軫生蒙蒙曾孫

政陽乘公乘詔復其家

案漢書蒙孫陽慶大夫政詔復其家此脫誤會字亦疑衍

師古

曰祕姓也讀如祕書之祕

餽

晉中行穆子圍鼓鼓之嗇夫餽間論請降穆子不受

利

姓解曰楚公子食采於利其後氏焉今爲蜀利州謹按漢紀高祖六年利幾反上自將擊破之利幾者項羽將也羽敗爲陳令降上侯之潁川上至雒陽舉通侯籍召之利幾

恐反則中山相乾之前已有幾特應劭未之思耳今補其

闕又河南利氏

案魏志吒利氏改爲利氏  
○案毛本吒利作叱利

冀

太原冀休光梁節度觀察留後弟休復梁觀察使光六世  
孫德榮宋有都官郎中冀榮膺司理叅軍冀式進士出身  
冀隨

貳

今望出河東

懿

春秋襄二十六年諸侯疆戚田取衛西鄙懿氏六十以與  
孫氏杜預曰戚城西北五十里有懿城因姓以名城然則

懿氏仕衛乃其先公族以爲氏者故懿氏卜妻陳敬仲

案

氏卜妻敬仲杜注陳大夫也此上言仕衛者或別爲秦錄一族則可今竟以懿氏卜妻敬仲爲衛臣未詳所本

姚泓有吏部郎懿橫風俗通云齊懿公後誤矣懿公桓公子桓公時已有懿氏

駟

出自姬姓鄭穆公子駢字子駟生夏字子西夏生帶及乞帶字子上乞字子瑕始以王父字爲駟氏帶生偃字子游乞生歊字子然歊生宏字子般又有黑字子皙及駟奉

季

出自姬姓魯桓公允夫人文姜方娠卜人謁之曰生有嘉聞其名曰友間于兩社爲公室輔季氏亡則魯不昌及生

男有文在其手曰友遂以名之而字季其後季友有大功

十魯受費以爲上卿魯人謂之季子卒諡成季生文子行

父

○案文六年穀梁疏引世本云季友生仲無佚無佚生行父杜氏世族譜亦以行父爲季友孫與穀梁疏合而

檀弓正義引世本又云公子友生齊仲齊仲生無逸似誤鄧氏更以成季生文子未詳所本始以字爲

季孫亦曰季氏文子生武子季孫宿宿生悼子季孫紇紇

生平子季孫意如意如生桓子季孫斯斯生康子季孫肥

肥曾孫曰昭子強自文子武子世執魯政爲上卿故季氏

爲強家其族曰公若公鳥公亥公冶公思展魴侯子言及

公鳥之子甲皆季氏春秋時隨有季梁楚有季然或出季

孫而梁乃名字並行非氏也陸終六子其季曰連爲芊氏

而一人爲季氏南唐有節度使季章廬陵人

白

謹案漢百官公卿表元初元年郎中令白爲更爲光祿勳

此卽自氏名爲者

攷証案史記酷吏楊僕傳有光祿徐自爲據此則非姓自名爲也鄧氏之說似

屬附會

姓苑有此氏而未詳今增修

利孫

晉大夫公孫食邑於利因爲利孫氏漢東萊太守任康娶

利孫氏女

利作

英賢傳後魏安樂任敘娶同郡利作氏女

棄疾

出自芊姓楚平王初名棄疾卽位改名熊居子孫以爲氏



悼王時棄疾休爲右師

季孫

出自姬姓魯公子友之後爲季孫氏後去孫稱季氏

季連

元和姓纂曰晉有堂邑大夫季連齊出自陸終第六子季連之後

季瓜

世本云周八士季騶之後爲氏騶或作瓜晉有祁邑大夫

季瓜忽

季老

世本宋華氏有華季老其子氏焉

地連

廣韻曰後魏虜複姓有地連氏

地倫

傳餘願複姓錄云代北人姓

白死獨膊

代北人四字姓

七志

寺

古寺人之後

異

廣溫州金州蠻多異氏

忌

風俗通周公忌父之後以王父字爲氏

寺人

元和姓纂曰宋寺人惠墻伊戾後誤矣伊戾姓惠墻春秋時晉有寺人披一名勃鞞字伯楚齊寺人貂寺人瘠環宋寺人羅寺人柳皆以官與名見豈伊戾獨爲得姓之始大抵寺人皆自有姓氏不過如今養子而冒其姓爾春秋已來無寺人氏今駁去

食其

漢廣野君酈食其玄孫賜以食其爲氏曾孫武爲侍中始改爲侍其

八未

緯

出姓苑

魏

出自姬姓周文王子畢公高封於畢裔孫畢萬事晉受魏  
爲大夫河中河西縣是也因以邑爲氏萬生芒季芒季生  
武子孳孳生悼子及錡顓悼子生莊子絳絳生嬴嬴生獻

子舒舒生襄子戊戊兄子侈字曼多

○案魏世家索隱引世本云獻子生簡子

取取生襄子多世族譜亦云魏曼多舒之孫與世本合史  
記唐書俱以侈爲舒子非是侈字曼多名字相配春秋分  
紀引世本舒生侈侈生曼多折爲二人蓋所据世本有錯  
誤此又云舒生襄子戊戊兄子侈與諸說俱不同未詳所  
本  
生桓子  
○案索隱引世本云襄子生桓子駒而魏世家  
以桓子爲侈孫唐世系表亦云曼多生文子須

須生桓子俱與世本不符此

代爲晉

案唐世系表晉作貴

卿其族魏

壽餘皆爲大夫桓子孫文侯斯始列爲諸侯斯生武侯擊

擊生惠王螭螭生襄王赫赫生哀王均均生恢恢二子伯

倫彥彥字叔倫

○案唐世系表作叔綸

張掖太守生歆字子胡鉅鹿

太守初居下曲陽二子愉悅愉字彥長侍中生宙字惠開

平原太守生紹曾孫宣北海公孫統二子儔爲東祖植爲

西祖儔孫藪三子儵生元同

○案唐世系表藪三子儵意暨意裔孫生士廓隋治書侍

御史士廓生又漢陽令又生元同此作儵生元同當有脫簡

字和初相唐武后五子悝

著作郎懷御史主簿恬鄭州刺史確司議郎皆至曾孫有

世系館陶魏氏漢兗州刺史衡曾孫珉始居館陶爲魏州

曲城人珉孫彥字惠卿後魏光州刺史生釗字顯義義陽

太守生伯裔

按唐世系表伯裔作伯允。案宋避藝祖諱故改爲裔。

長賢長賢北齊

屯留令生徵字玄成相唐太宗侍中鄭文貞公四子叔玉

叔愉叔琬叔璘叔玉光祿少卿及其子膺皆襲封叔璘禮

部侍郎叔瑜豫州刺史生華禮部侍郎武陽男華與薛稷

俱傳其父筆意世稱善書者前有虞褚後有薛稷生某

按唐

世系表某字應作瞻字

駕部郎中叔璘生汝陽令因

按唐世系表因作殷

因生

監察御史明明生靈臺令馮猷

按唐世系表馮猷作馮憲。案汲古閣本唐世系表

作馮猷

馮猷生暮字申之相宣宗門下侍郎平章事暮生潛

字蘊華滂字進禹潛生敖宋城魏氏與館陶同祖有元忠

舊名眞宰相武后中宗謂之魏齊公生太僕少卿昇及晃

鹿城魏氏亦與館陶同祖有知古及盈知古相明皇五子

詰延安太守比陽安太守林朔州刺史珏鴻臚少卿曜贊  
善大夫盈生昌昌生扶字相之相宣宗扶生箴字守之刑  
部侍郎清河魏氏漢魏無知曾孫謨清河太守始居焉任  
城魏氏無知曾孫不害生漢任城太守舍又居任城宜陽  
魏氏東郡魏氏出自鉅鹿

費

出自顯帝之後女華生大費佐舜調馴鳥獸舜賜之贏姓  
其子若爲費氏其玄孫曰費昌當夏之季去桀歸商爲湯  
御以敗桀於鳴條蜀譜云益州諸費有名位者多唐黃巢  
有偽樞密使費傳古姓纂云費出姒姓禹後未知何據後  
漢犍爲人費貽漆身佯狂不事公孫述

尉

出自古討姦之官曰尉氏鄭尉氏獨以其官爲族春秋時鄭有尉止生翩漢地理志陳留尉氏縣應劭曰古獄官曰尉氏鄭之別獄也瓚曰鄭大夫尉氏之邑故遂以爲邑師古曰鄭大夫尉氏亦以掌獄之官故爲族耳應說是也或曰尉音鬱誤矣後涼有寧遠將軍金城太守尉祐南涼有撫軍從事中郎尉肅又傳檀將尉賢政固守浩亶不降熾磐

聃

纂文要曰古氣字

魏強



元和姓纂曰魏武子支孫莊子快生強爲魏強氏

費連

官氏志後魏費連氏改爲費氏望出河南

費聽

唐党項以姓爲部有費聽氏

古今姓氏書辨證卷二十九終

古今姓氏書辨證卷三十

九御

御

元和姓纂周禮御人因官命氏左傳有御叔今從之又云漢公孫丞相故人御人倩誤矣故人乃鄒長倩事具西京雜記

慮

謹按左傳有賈人司徒老祁慮癸二人杜預別司徒老祁爲一人則慮癸宜爲姓慮名癸

鑪

音慮左傳楚大夫鑪金之後

庶

檀弓子思之母死于衛門人曰庶氏之母死何爲哭於孔氏之廟注曰庶姓也急就章有庶霸遂吳氏討論此氏最爲詳明有據者

茹

○案此條原本次豫氏後依廣韻移正

出姓苑音去聲又音上聲

豫

謹按戰國策曰豫讓晉畢陽之孫詳此則豫子之先出畢氏畢氏之先出於姬氏史記宋有魚者豫且必其後也

御龍

出自祁姓陶唐氏之孫曰劉累夏王孔甲擾于畜龍帝賜

之乘龍河漢各二各有雌雄孔甲不能食劉累學擾龍于  
豢龍氏以事孔甲能飲食之夏后嘉之賜氏曰御龍以更  
豕韋之後

去疾

世本云鄭穆公子去疾之後

去斤

代北去斤氏魏孝文時改爲艾氏

著止

出自己姓莒著止公之後莒夷國無諡而號故以號爲氏  
著止莒別邑也

十遇

注

出姓苑

裕

出姓苑西秦時鮮卑大夫裕苟來降拜建忠將軍蘭泉侯

諭

姓書云諭與喻同皆音樹

喻

出自姬姓鄭公子渝彌周桓王時爲鄭司徒

案左傳鄭有堵俞彌無渝

彌名然俞彌乃堵氏此疑誤

後立別族爲渝氏歷秦漢至景帝皇后諱

志字阿渝中二年避諱改水爲喻因爲喻氏南史梁世寒

門達者唯陳慶之與俞藥藥初爲武帝左右帝謂曰俞氏

無先賢世人云俞錢非君子所宜改姓喻藥曰當令姓自  
於陳厯位雲旗將軍安州刺史唐咸通中有刺史喻士珍

俞

○案此條原本次傳  
氏後依原音移正

今撫州臨川民有俞氏不音平聲而音喻謹按喻氏舊音  
樹必治平初避上嫌名聲同者因去口爲俞又嫌其與平  
聲俞氏相雜則音喻以別之

案廣韻俞氏無音去  
聲者今附入遇韻

傳

唐宰相表曰出姬姓黃帝裔孫大由封于傅邑因以爲氏  
商時虞虢之間有傅氏居于巖傍號爲傅巖高宗得說於  
此命以爲相裔孫漢義陽侯介子始居北地曾孫長復封  
義陽侯生章章生叡代郡太守二子異魏冀州刺史允後

漢弘農太守字固二子嘏松嘏字蘭石魏太常陽都元侯  
嘏生祗晉太子太傅靈川縣公祗三子宣晉御史中丞暢  
後趙大司馬雋東明亭侯暢生冲詠嘏十一世孫奕唐中  
散大夫太史令泥陽男北齊有行臺僕射伏武孫文傑唐  
祀王府典軍 清河傅氏出自後漢漢陽太守壯節侯燮  
字南容生幹字彥林魏扶風太守幹生元字休奕晉司隸  
校尉鶡觚剛侯元生成字長虞晉司隸校尉正侯始自北  
地徙清河裔孫士後魏爲南陽太守生交益殿中侍御史  
交益生元淑依仁游藝元淑冬官尚書生伯玉及司勳郎  
中黃中依仁生侍御史延嗣游藝相武后所謂四時仕宦  
者後漢武威太守護羌校尉傅育生毅明進侯南史傅炎

字季珪父僧祐山陰令有能名炎仕宋爲武康令遷山陰  
令並著能名二縣皆謂之傅聖父子並著奇績時云諸傅  
有理縣譜子孫相傳不以示人宋傅宏之字仲度北地泥  
陽人舊屬靈州漢末失土寄馮翊置泥陽富平二縣廢靈  
州故傅氏悉屬泥陽晉武帝太康三年復立靈州縣傅氏  
還屬靈州宏之高祖祇晉司徒後封靈州公不欲封本縣  
故祇一門還屬范陽曾祖暢祖洪度江父歆梁州刺史後  
涼張掖督郵傅曜爲止池令尹興所殺前燕有護軍傅顏  
今謹按舊書自風俗通至元和姓纂皆云說築於傅巖因  
以爲姓大誤矣謹按國語周内史過對惠王曰丹朱之神  
降于莘宜使太史帥狸姓奉犧牲獻焉王從之使太宰忌



父帥傅氏及祝史往韋昭注曰狸姓丹朱之後在周爲傅氏神不歆非類故帥以往又春秋時鄭大夫有傅瑕晉有傅僂傅氏亦未嘗乏人今詳此則堯出于黃帝丹朱出于堯大由宜出于丹朱傅氏更虞夏商周爲族姓已久特少顯者故史失其系爾今從唐表爲正止改盤庚二字爲武丁姬姓爲狸姓黃帝爲堯帝又止于相裔二字間增東州時鄭有傅瑕晉有傅僂十一字則極詳明矣

注吾

○案此條原本次具封氏後依廣韻移正

唐會昌中回鶻夏頡斯

○案唐書回鶻傳本作黠戛斯此疑誤

君長阿熱使

注吾合素上書注吾虜姓也合言猛素者左也謂武猛善射者行三歲至京師武宗大悅命班渤海使者上以其處

窮遠能修職貢云

務相

廩君姓務相氏謹按後漢南蠻傳務相乃巴氏子非以務相爲氏今駁去

具封

元和姓纂曰鄭公子具食采開封因氏焉鄭大夫具封狐人

傅餘

○案此條原本次俞氏後依廣韻移正

晉傅餘顧著複姓錄自云傳說之後留居傅巖爲傅餘氏

樹洛干

代北樹洛干氏後改爲樹氏

十一暮

慕

今開封市人有慕氏不詳所出號州團練使鄆州總管慕興定州人或作慕容氏

募

謹按南史新羅國王姓募名泰始梁普通二年遣使隨百濟奉獻方物

度

漢度安年十七爲侍郎後漢度尙荊州長史今詳度安乃

慶安世事見

○案原本脫見字今補

西京雜記

○案西京雜記慶安世年十五爲成帝侍

郎此作十七蓋亦沿姓源韻譜之誤姓源韻譜誤也

路

出自姬姓帝摯子玄元堯封於中路歷虞夏稱侯子孫以

國爲氏

案汲冢周書路人大竹注路人東南蠻又國語北有路洛泉徐蒲皆赤翟別種隗姓子爵左傳宣公

十五年晉滅之路子嬰兒是也顏師古注急就章路水名又因爲縣在涿郡界居者氏焉王應麟注姁姓陸終子求言之後別封路元和姓纂亦作黃帝之後惟唐世系表謂出自姬姓帝摯後辯證所引蓋據此西漢有官

師路扈爲天子筆皆直百金梁孝王客路僑如善賦符離

侯博德始居平陽裔孫嘉字君賓安東太守曾孫建生慶

案汲古閣本建曾孫慶此作生不合

後魏太常卿生彩後周夏州刺史彩生

充

案充唐世系表作克○案汲古閣本作克

隋兵部侍郎閔鄉公六世孫巖

案唐

世系表六世作七世

字魯瞻相懿宗又泌生隨字南式相文宗皆有

傳及世系表

潞

出自隗姓赤狄之種曰潞氏其爵爲子其地上黨潞縣是也春秋時潞子嬰兒爲晉所滅子孫仕晉又河南潞氏後魏官氏志沒路真氏改焉

顧

唐表云出自己姓顧伯夏商侯國也成湯伐韋顧顧之子孫散亡以邑爲氏初居會稽漢有顧翱者事母孝母喜食雕胡徙居太湖湖中自生雕胡得以養母至吳丞相雖弟侍中徽又徙居鹽官徽十世孫越陳黃門侍郎孫裔唐著作郎餘杭公生琮相武后生潤祕書郎浚齊安太守唐顧雲字垂象池州人虞部郎中爲高駢淮南從事有顧氏編

遺十卷荅川總載十卷纂新文苑十卷啟事一卷賦二卷  
集遺具錄十卷又吳人祕書郎顧況子非熊大中時爲盱  
眙簿棄官隱茅山有詩一卷大中校書郎顧陶有唐詩類  
選二十卷顧氏譜云越王勾踐七代孫閩君搖漢封於甌  
搖別封其子爲顧余侯因氏焉漢初分會稽爲吳郡遂爲  
吳郡人

互

○案此條原本次胙氏後依廣韻移正

唐紀異錄寧州羅川人互可思年已百歲明王得二十七  
仙玉像于金華可思其地卽可思莊也可思至京失其所  
在

胙

姓解曰左氏周公之胙嗣因有胙氏謹按邵說誤矣當云  
出自周公之後封於胙子孫以國爲氏可也然世無此氏  
見史傳者今姑存之

### 慕容

前燕錄云昔高辛氏游于海濱留少子壓越以居北夷邑  
于紫蒙之野號曰東胡秦漢之際爲匈奴所敗分保鮮卑  
山因山爲號至魏初率義王莫護跋攜部落入居遼西燕  
代多冠步搖冠跋好之乃斂髮襲冠諸部因謂之步搖後  
音訛爲慕容子木延左賢王孫涉歸晉拜單于遵循華俗  
至廆字奕洛瓌始號燕王位車騎將軍平州牧大單于在  
位四十九年薨策贈大將軍開府儀同三司襄公追尊高

祖武皇帝廟號高祖弟運平西王虓五子翰虓仁昭幼翰  
字元邕建威將軍虓字元真侍中大將軍大都督河北諸  
軍事大單于燕王在位十五年追諡文明皇帝廟號太祖  
子雋嗣位征虜將軍昭建武將軍運生制尙書令臨澤侯  
虓五子雋恪垂納德雋字宣英初爲燕王太子嗣位承制  
一如鹿虓故事以永和八年僭卽帝位國號大燕十一年  
而死諡景昭皇帝廟號烈祖子暉嗣恪字元恭太宰錄尙  
書事太原王垂字道明仕符堅爲京兆尹泉州侯太元十  
一年據中山僭卽尊位國號後燕在位十三年諡成武皇  
帝廟號世祖子寶嗣納北海王以子超僭立追諡穆皇帝  
德字元明仕後燕慕容寶爲使持節都督冀兗青徐荆豫



六州諸軍事特進車騎大將軍冀州牧隆安四年據廣固

僭立國號南燕在位五年諡獻成

○案晉載記十六國春秋俱作獻武此疑誤

皇帝無子以母兄納之子超嗣制生精北地愍王入後魏  
爲豆盧氏雋五子曄臧曄泓沖曄爲太子早死諡獻懷臧  
撫軍大將軍樂安王曄字景茂嗣位二十一年而國亡入  
前秦仕苻氏爲尙書新興侯追諡幽皇帝泓濟北王沖中  
山王垂兄子紹鎮南將軍楷征西大將軍太原王垂六子  
全寶農柔隆熙全諡莊獻太子追諡皇帝寶字道裕仕苻  
堅爲凌江將軍垂僭位立爲太子垂死嗣立二年而蘭汗  
殺之諡惠愍皇帝廟號烈宗子盛嗣農大司馬隆征北將  
軍高陽王熙字道文仕盛爲驃騎大將軍尙書左僕射中

領軍盛死繼立在位六年寶養子高雲弑之而自立追謚  
昭文皇帝雲亦爲馮跋所滅垂弟子宙司空樂浪王納子  
超仕叔父德爲驃騎大將軍北海王德死以超嗣在位六  
年宋公劉裕滅之德兄子麟司空趙王寶四子盛會策元  
盛字道運嗣位三年而死謚昭武皇帝廟號中宗叔父熙  
嗣會清河王策字道符立爲太子蘭汗殺之元字道光平  
原公盛子定德從弟鍾字道明都督錄尙書事奔于姚興  
興拜始平太守歸義侯自晉永嘉時建國爲吐谷渾隋唐  
間慕容伏允爲王死長子順爲可汗順子諾曷鉢立封青  
海國王諾曷鉢死子忠立忠死子宣超立宣超死子曦皓  
立龍朔三年吐蕃取其地凡三百五十年而國絕貞元十

四年以朔方節度副使慕容復爲長樂都督封青海郡王  
襲可汗號復死停襲

### 慕輿

元和姓纂曰鮮卑慕容氏音訛爲慕輿氏前燕錄有慕輿  
虔慕輿嵩左衛將軍慕輿騰太師慕輿根尙書左僕射慕  
輿護司徒慕輿拔越騎校尉慕輿良燕慕容廆有臣曰慕  
輿句勤恪廉靖使掌府庫不案簿書而始終無漏又慕輿  
河明敏精審使典獄訟覆訊精允

### 路中

賈執英賢傳曰路中大夫以爲氏

### 路洛

見入聲十九鐸烏洛氏

護諾

○案此條原本欠素黎氏後依廣韻移正

後魏西河護諾干內附姓纂以爲護諾氏

素和

唐嘉善府左果毅都尉誓狀云其先出自顓帝王子偁曾孫重黎誅共工氏有功堯命其子和仲居春官代爲岳牧和仲之孫宗處代清素自守百姓號曰素和子孫氏焉後有宜陽公素和明卽宗處之後也北齊土開改姓和氏

素黎

後魏官氏志曰素黎氏後改爲黎氏

布却

出姓苑

庫門

官氏志庫門氏後改爲河南門氏

庫汗

唐貞元中范陽判官有庫汗勣

庫狄

鮮卑段磾之後姓庫狄後周有少師庫狄峙

庫成

燉煌實錄右奉車都尉庫成述生濟爲大夏令

步叔

家語齊人步叔乘爲孔子弟子字子車

案廣韻作少叔乘

庫如于

出官氏志

庫儻官

前燕錄燕將庫儻官斌降魏又叛魏歸燕魏斬斌并其族  
幽州刺史昌征北將軍提又慕容垂左長史庫儻官偉官  
至太師慕容寶時西河公庫儻官驥守中山爲慕容詳所  
殺盡滅庫儻官氏其族有先降魏者後有岷山桓公庫儻  
官泥隋初改爲庫氏

步大汗

北齊步大汗氏後改爲韓氏

步鹿孤

古今類事卷二十一  
二  
代北步鹿孤氏後爲步氏亦作步鹿根氏

步六根

代北步六根氏後改爲步氏亦作步鹿根氏

步六孤

後魏步六孤真爲長安鎮將孝文入中國改步六孤爲河南陸氏

十二霽

蒂

或作薨音帝漢王莽傳有中常侍薨惲

系

楚有系益

惠

梁相惠施著書稱惠子西漢長安儒生惠莊聞朱雲折五鹿充宗之角乃裹糧從之

桂

漢有燕人桂褒爲揚州刺史後漢太守陳球碑陰有城陽  
炅橫漢末被誅有四子一守墳墓姓炅一子避難居徐州  
姓春一子居幽州姓桂一子居華陽姓炅四字皆九畫  
炅春炅皆八畫桂字十畫此云四字皆九畫疑有誤今詳橫必王莽時死褒乃其後  
也近世桂氏望出天水燕郡

春

音桂

一云本姓炅名貞爲秦博士坑儒後改此姓



炅音桂

太宗廟諱從日從火事見桂氏

炅

前漢儒林傳尚書大夏侯學有齊人炅欽字幼卿爲博士其師許商號欽爲文學以比四科

隸

王莽大司馬隸並

第三

其先齊諸田氏漢武徙諸田於園陵以門族次第爲氏廣孫田癸爲第三氏

第五

唐有第五華弟琦相肅宗又有宦官第五可範

細封

○案此條及下契苾氏條原  
本次惠臨氏後依廣韻移正

唐党項別部姓細封氏

契苾

九姓回鶻匈奴苗裔後魏時謂之高車亦謂之回鶻亦曰  
敕勒周隋時又曰鐵勒居陰山之濁洛河北其一曰契苾

部亦曰契苾羽在延耆西北鷹莎州其酋阿楊

案唐書回鶻傳作哥

楞

自稱可汗與弟莫賀咄特勒皆有勇莫賀咄死子何力

尙紐率其部帥來歸詔處之甘涼間以其地爲榆溪州其  
後哥舒翰守潼關時蕃將契苾寧以本軍隸麾下

惠叔

魯大夫孟惠叔難後爲氏後漢尙書郎惠叔儉

惠牆

左傳宋寺人惠牆伊戾注惠牆姓也

麗飛

麗飛與荔非同

古今姓氏書辨證卷三十終

古今姓氏書辨證卷三十一

十三祭

衛

出自姬姓周文王后妃太姒生十子長伯邑考次武王發  
次管叔鮮次周公旦次蔡叔度次曹叔振鐸次成叔武次  
霍叔處次康叔封次聃季載武王定天下封紂子武庚爲  
商侯使管蔡霍三叔監之成王卽位三叔以武庚畔周公  
相成王誅之立康叔爲衛伯居河淇之間故商墟地成王  
旣長舉康叔爲大司寇康叔六世孫頃侯始進爵爲侯頃  
侯之孫和厯相周厲王幽王年九十餘薨諡睿聖武公於  
是又進爵爲公武公之後傳國三十餘世至衛君角爲秦

二世所廢遂爲庶人子孫以國爲氏陳涉起兵時燕人衛滿避地朝鮮自王再傳國滅漢丞相綰世居代之大陵裔孫暲明帝時以儒學自代召至河東安邑卒因賜所亡地葬之子孫家焉後漢蔡炎初適河東衛仲道漢末護羌校尉瑤卽其後暲孫覲魏尙書覲生瓘字伯玉晉太保錄尙書事蘭陵郡成公四子恒嶽裔宣宣尙武帝公主恒字巨山長水校尉謚蘭陵貞世子生璪玠璪字仲寶散騎常侍江夏郡公玠字叔寶總角時乘羊車入市見者稱爲玉人好言玄理時王澄王玄王濟有盛名皆出其下世謂王家三子不如衛家一兒又云叔寶神清位太子洗馬子孫世居安邑至唐開元時隱者衛大經始爲蒲州解人善易嘗

預筮死日先鑿墓自爲誌文果如筮而終代人衛操字德元仕魏爲相晉定襄侯與宗親入魏者義陽亭侯衛護協義亭侯衛韃安樂亭侯衛勲都亭侯衛倩信義將軍衛沈前秦有涼州別駕衛翰前燕棗疆令衛顏雋南涼衛因號文武之秀傑後燕蘭穆腹心衛雙

芮

出自姬姓周卿士芮伯之後以國爲氏元和姓纂曰今望出扶風

贅

戰國策齊人有贅子嘗死贅上之難

案國策濮上之事贅子死章子走濮上此

作贅上誤矣注云皆以名子之章匡章也然則贅乃人名其氏未可考又查各姓書所載並無贅姓字典廣韻諸書

註釋贅字之義又無註贅爲姓者今名世卽引國策  
贅子一語又別無考證之條遂收入姓氏未詳所本

銳

邵氏姓解曰齊銳司徒後

敝

左傳齊大夫敝無存以死事受賞追賜犀軒直蓋葬以上  
卿之禮後氏焉

制

漢藝文志曰漢興制氏以雅樂聲律世在樂官頗能記其  
鏗鏘鼓舞

厲

謹按春秋厲國在義陽隨縣北之厲鄉楚與國也其後以

國爲氏漢有義陽侯厲溫敦後居東陽

世

出自春秋衛世叔氏之後去叔爲世氏漢九江都尉世寵  
漢藝文志陳人世碩著世子二十一篇謹按古書世字唐  
諸儒避太宗諱皆改爲太字王世子改爲太子之類是也  
論語曰世叔討論之乃子太叔游吉也

十四泰

泰

與太同文王臣泰顛之後又禮記有泰運

太

與泰同



藹

晉有南海太守藹煥望出魯國

柰

出姓苑

大

唐渤海國王姓大氏其王乞乞象仲生祚榮私謚高王祚榮生武藝門藝武藝謚武王生文王欽茂欽茂生宏臨宏臨生成王華與華與少子曰康王嵩鄰嵩鄰生定王元瑜僖王言義簡王明忠明忠從父曰宣王仁秀仁秀孫彝震虔見元錫皆稱繼立五代時其王曰譚選王子曰昭順相曰誠諤使曰昭左曰禹謨曰光贊曰陳林皆大氏

蹠○案此條原本次蔡  
氏後依廣韻移正

亦作蹠音帶又音多何奴傳有蹠林王莽傳有中常侍蹠

暉

案今本漢書皆作蹠帶蹠蹠  
三姓同引一人似必有誤

嘗使責問孫女妨詛祝姑

事者師古曰音帶又徒蓋反

貝

千姓編曰今吳越多此姓宋常州貝氏襄生俛俛生沂沂  
生寶政和五年上舍

沛

姓苑曰吳人音貝

會

風俗通曰陸終第六子會人之後

最

前漢郊祀志秦始皇時燕人最後爲僊方道形解銷化師  
古曰人姓名然則最乃人氏而姓書未有今增收

祓

○案此條原本次賴氏後依廣韻移正

後漢來厯傳有光祿勳祓諷註丁外反又鄧隆傳注音丁

案後漢書陳忠傳尙書令祝諷祝或作祓

蔡

出自姬姓齊大夫蔡朝楚大夫蔡洵蔡鳩居晉太史蔡墨  
皆是也秦相剛成君蔡澤漢陳留圉蔡氏勲字君巖郿令  
曾孫攜字叔業新蔡長生稜字伯直正定公質字子文衛  
尉稜生邕字伯喈議郎質生睦魏尙書二子德樂平太守

宏陰平太守德生克從事中郎宏生豹晉建威將軍徐州  
刺史克生謨晉侍中司空支穆公二子邵永嘉太守系撫  
軍長史生紉司徒左司屬二子軌給事中廓宋吏部尙書  
軌生淡廓生興宗宋征西將軍開府儀同三司左光祿大  
夫三子順太尉從事中郎約太子詹事擢中書令吳郡太  
守又後漢遼東太守蔡諷後蜀左僕射蔡興以切諫誅

賴

三代諸侯賴子之國春秋魯昭四年楚滅之子孫以國爲  
氏

太叔

出自姬姓衛僖侯八世孫儀別爲太叔氏諡文子文子生

懿子太叔申申生悼子太叔疾疾生僖子太叔遺謹按太字古本皆作世所謂世叔是也漢尙書太叔雄晉東平人太叔廣爲列卿以樞機清辯著名

## 太士

姓纂曰太士氏永嘉人建安太守太士靈秀今松陽有此氏武陽高棐曰今永嘉有此族曰大士氏不音泰謹按古獄官曰大士宜以官氏必後世字與音訛而爲太也

## 太史

漢有尙書郎太史慈其先齊太史之後以官爲氏或云周太史後唐藝文志有太史叔明孝經發題四卷

## 太室

謹按太室山在河南陽城縣西南其先居人因山爲氏

太師

元和姓纂曰商有太師摯周有太師疵謹按二人皆以官稱而未必爲氏姓纂誤矣

太祝

謹按古者擇先聖之後有光烈而能知山川之號高祖之主肅恭明神者以爲太祝故後世以官氏

太陽

姓解曰神仙傳有太陽子白日昇天

大陸

齊太公後食邑陸鄉因爲大陸氏謹按左傳齊大夫東郭

賈字子方食邑大陸號大陸子方因氏焉

大庭

英賢傳曰古帝號一云炎帝諸侯也後爲氏

大心

英賢傳曰楚臣大心令尹得臣之子其孫以王父字爲氏  
楚襄王時有大心子成爲黃邑大夫

大狐

出自姬姓晉大夫狐突字伯行文公重耳外祖父也生毛  
及偃毛生溱皆爲晉卿別爲大狐氏世本有晉大夫大狐  
容卽其後

大公

世本有大公叔顓契丹有戶部使大公鼎渤海人

大野

後魏南青州刺史大野拔都大野兒周書閭慶賜姓大野氏後魏龍驤將軍謝懿亦賜姓大野氏唐太祖景帝西魏時賜姓大野氏官至太尉與李弼等八人佐周代魏有功皆爲柱國號八柱國家隋文帝相周始復高祖姓李氏

大夫

漢淮南厲王傳有男子但又大夫但

案漢書應從師古說刪去男子但又四字

卽張晏注曰大夫姓也上云男子但明其本姓大夫也師

古曰旣曰大夫但又曰士伍開章明其大夫也今從師古

不爲氏



大食

唐西域傳永徽二年大食王弼密莫末賦遣使朝貢自言王大食氏有國三十四年傳二世舊史云王姓大食氏謹案大食隋時東并波斯遂爲強國蓋以姓名國如古趙魏之類

大彭

彭祖爲虞夏諸侯號曰大彭氏

大賀

唐契丹傳其君長大賀氏契丹與唐俱興亡三百年間乍臣乍叛至阿保機滅之大賀氏乃絕

大山

大亦作太黃帝之相有太山稽

大連

出自古賢人大連之後

大征

姓苑曰下邳人

大師

出姓苑

大拔

唐突騎施首領之姓

會牙

牙音雅姓苑曰齊靈公子虺生竈爲會牙氏謹案惠公之

孫竈字子雅非靈公之子必子雅父子嘗食采於會因氏焉

會稽

夏少康封少子於會稽遂爲會稽氏漢初徙熊稽山始改爲稽氏

蔡仲

元和姓纂曰蔡仲胡之後趙將有蔡仲其

大莫干

周末有尉遲迴將軍大莫干章後魏改爲河南郃氏

大利稽

後周賜蔡祐姓大利稽氏

十六怪

祭

出自姬姓周文公子祭伯爲周畿內諸侯相天子爲三公  
後以國爲氏或云春秋時祭封人仲足爲鄭卿子孫氏焉  
後漢二十八將有祭遵字弟孫潁川潁陽人征虜將軍潁  
陽成侯兄午酒泉太守從弟彤字次卿太僕生逢參參遼  
東太守

介

謹按春秋有賢人介之推又有東夷附庸國介葛盧葛盧  
介君之名也之推不見得姓之始葛盧不見亡國之年二  
人之國與姓不相公也今依姓纂爲定後世討論姓氏者

勿誤以葛盧爲之推之祖當詳辨之

玠

出姓苑

蒯

西漢有辯士蒯徹避武帝諱改名通其先蓋以所食邑爲氏其地河南縣西南蒯鄉是也凡以姓氏見於姓書未原其所自而春秋五經有其人者當以春秋五經爲始

賁

唐白鶴觀道士賁雲陶亦音蒯今臨海有此氏

賁

音快

魯人賁尙畫宮於道受哀公弔曾子謂不如杞梁妻知禮

祭公

姓解曰祭公謀父之後

十七夬

快

出姓纂姓苑

噲

快音

燕王噲之後孝子傳有噲參以藥補傷鶴鶴銜珠報之

殮

音快亦作殮韻譜曰晉有殮錢

○案廣韻十七夬作殮錢無殮字今依殮字收入

十八隊

對

千姓編曰急就章有對若芳

# 十九代

璦

○案此條原本次戴氏後依廣韻移正

音愛玉篇曰璦至大玉也

戴

漢汝南慎陽戴自遵字子高平帝時侍御史避王莽亂歸鄉里家富尚俠食客常三四百人時人語曰關中大豪戴子高孫伯鸞叔鸞叔鸞名良有隱德五女皆有隱者之風見逸民傳九江戴氏聖德兄弟善學世號大戴小戴禮元和姓纂有廣陵譙國清和三族

古今姓氏書辨證卷三十一終

古今姓氏書辨證卷三十二

二十一震

振

○案此條原本次覺氏後依廣韻移正

出姓苑

信

風俗通魏公子信陵君無忌後氏焉李納將信都承慶爲  
青州刺史唐藝文志有信都芳刪注樂書九卷及器準三  
卷○案信都係複姓不應襍入信氏條此疑有誤

遜

音各

出姓苑

蘭

音各



出自姬姓晉穆侯之子成師封邑於韓裔孫韓獻子厥厥  
立孫康食采於藺因氏焉

晉

姓書皆云出自姬姓周武王子唐叔虞封爲晉侯傳國二  
十代爲韓魏趙所滅子孫以國爲姓考其說必風俗通之  
蔽也謹案春秋楚大夫有晉陳其後晉鄙爲魏將軍當晉  
陳時晉方爲諸侯盟主未有三卿分地之事安得以國爲  
姓竊意晉文侯仇之後并於曲沃當時必有公族自傷亡  
國以國爲氏者而秦火之後史籍不存因失其傳爾今以  
晉陳爲正凡人姓似出於國而非者秦楚晉宋齊皆是也  
姓書一槩造端疑誤相襲使天下譜系不明久矣今一洗

之後世君子慎勿泥古而喜近似之說也前蜀有節度使  
暉許州人

豐

欣去聲亦作豐出自魯宗人豐夏之後邵氏以爲豐誤矣  
印

出自姬姓鄭穆公生倫字子印倫生黑肱字子張黑肱生  
印段字子石以王父字爲印氏段生癸字子柳又有印堇  
父今望出馮翊

慎潰

魯大夫慎潰氏其家奢侈踰法孔子爲司寇越境亡徙

二十三問

問

姓苑云襄陽人

鄆

音運

魯大夫食采於鄆氏焉其地今東平府是也

覲

音運。案此條原本失訓氏後依廣韻移正

姓解有此氏恐其先員氏之別也

訓

周禮訓方氏後因官爲姓

問弓

出姓苑

問薪

出姓苑

運奄

史記曰秦之先嬴姓其後分封以國爲姓有運奄氏

運期

後漢梁鴻改姓運期名耀字侯光與妻子居齊魯間

二十四炊

斬居近切

戰國策韓上黨之守斬黷史記楚大夫斬尙漢功臣信武肅侯歙汾陽莊侯彊並家長安歙音翕子亭嗣坐事免元康四年詔復歙立孫之子長安生造安漢家彊生共侯解解生康侯胡胡子石失侯元康四年

案此四字原本脫詔去今据漢書增入

復彊玄孫長安公乘忠家劉聰時有鎮北將軍靳沖望都  
公靳陵中護軍靳準皆長安之後後燕術士靳安南燕撫  
軍司馬靳瓌

## 二十五願

怨

○案此條原本次憲  
氏後依廣韻移正

## 出姓苑

万

後魏官氏志万忸于吐万氏並改爲万氏

案魏書官氏志  
無此文疑有誤

望出河南隋有穀城公万緒

案隋書作穀城  
郡公吐萬緒

後漢万震作

南州異物志

萬

漢二十八將扶風茂陵人萬修字君游爲右將軍槐里侯  
生泣氏侯普普生扶柳侯親無子封修曾孫豐爲曲平亭  
侯子熾嗣無子又封修玄孫恭爲門德亭侯謹按姓源韻  
譜以爲自武王以萬人得天下因以爲氏誤矣武王之代  
商也虎賁三千人其書曰受有億萬人惟億萬心予有臣  
三千惟一心明周之興以德不以衆今云以萬人得天下  
是後世好兵而無識者之言且於古無稽不可採信

曼

音萬

出自子姓商王後春秋時鄧國楚鄭皆有夫人鄧曼是也  
姓書未收今增入

婉

纂文云古万字

憲

韻譜曰八元仲獻之後

案左傳高辛氏才子八人一日叔獻此作仲獻而以憲氏爲其後未

詳所本。案廣韻獻憲二字皆姓此疑獻氏條注誤入憲下

曼止

漢紀高祖七年韓王信亡走匈奴與其臣蔓止臣立趙後爲王師古曰曼止母止本一姓語有緩急故爲兩氏

万紐于

紐一作忸魏有柱國万忸于謹後周唐瑾樊琛並賜姓万

紐于氏

案魏官氏志作勿忸于氏。案廣韻勿亦作万

二十六恩

頓

出自姬姓國頓子之後戰國有頓弱一曰頓子魏志華陀傳有督郵頓子獻

論

西秦錄有將軍論叔達謹按唐吐蕃官大相曰論苴副相曰論苴扈莽各一人亦號大論小論又總號曰尙論掣逋大抵論者吐蕃相也唐太宗時吐蕃大論薛東祿贊始入朝召對合旨帝以琅邪公主外孫妻之東錄贊有子欽陵曰贊婆曰悉多于曰勃論詔其兄弟並當國欽陵子弓仁聖歷二年以所統吐渾七千餘帳自歸授左玉鈐大將軍封酒泉郡公始以其世官爲論氏弓仁卒贈撥川郡王孫



瑀以殿中監從李光弼破史朝義有戰功封蕭國公爲英  
武軍使論氏遂爲唐名將家武威郡誠節生河東節度副  
使惟清襲爵其弟惟良鄜州防禦使惟貞河南節度副使  
惟賢劔南節度使西平郡王惟明鄜坊節度使建安郡王  
惟貞生僂偕伾伾生唐侍御史晃又吐蕃使者論仲琮論  
巖等十數人朱論氏唐御史晃三世孫勅生衡衡生蘊蘊  
生叡叡生程侍御史程二子翊駕部員外郎翱長安簿  
困沒長

唐南詔傳驃國古朱波也其王姓困沒長名摩羅惹

二十八翰

汗

戰國策楚有汗明春申君嘗詔門吏爲汗先生著客籍

駢

出姓苑音汗

炭

姓解曰西京雜記有長安人炭虬謹按西京雜記有長安  
慶虬作清暑賦託名相如乃盛行于世非炭氏也

犴

音岸

漢書梁王傳睢陽人犴反師古注曰姓犴反名也

僕

集韻曰姓也音漢

案玉篇僕呼肝切音漢姓也廣韻不載此字今附入翰韻

幹獻

世本宋司徒華定後爲翰獻氏

二十九換

貫

姓苑曰戰國策齊有貫珠漢初趙相貫高後漢護羌校尉  
貫友石勒有法曹令史貫志出自貫國之後爲氏周初分  
魯侯以貫國之鼎明堂位所謂貫鼎是也

灌

謹按春秋傳云斟灌爲過澆所滅因氏焉

冠

去聲

劉聰嘗使冠威監東宮

襲

取筭切○案此條原本  
次段氏後依廣韻移正

隋南寧夷麤翫降拜昆州刺史先是麤瓚竊據南寧州乃漢牂牁地梁遙授刺史其子震相承爲酋帥太平公史萬歲擊平之唐武后時有中郎將麤寶壁今望出晉江

段

○案此條原本次與氏後依廣韻移正

三輔決錄曰段氏李老君之自出段干木之子隱如入關去干字誤矣段以字段干以地本爲二族不可合爲一事也前秦扶風太守段鏗望出馮翊後秦黃門郎段章以儒術侍講東宮後涼建康太守段業後燕太保段崇慕容寶母段氏尊爲皇太后又趙國侍郎段平子長上段速骨殺樂浪王宙叛伏誅段儀及段溫收部曲于內黃段木延弒慕容冲前將軍思悔侯段璣殿中將軍段讚讚子泰南燕

徐州刺史段玄奔魏散騎常侍段封伏誅又左軍將軍段暉前燕鮮卑別部段遼及弟蘭蘭子龕前燕伏順將軍龕弟熙欽族人勁勤勁尚書郎南涼安北將軍段苟又段懿武威之宿望西秦中尉段暉

案晉書乞伏熾盤載記作段暉爲中尉

唐臨洮

人段志立典禁衛軍門不夜開太宗以爲眞將軍

奐

出姓苑

冠軍

謹按應劭注漢地里志曰南陽郡冠軍縣武帝置故穰盧陽鄉宛臨洮聚也武帝以封霍去病去病頻出征匈奴功冠諸軍故曰冠軍然則後人以邑爲氏穰宛皆南陽縣名

洪音桃

段干

出自李氏皐陶之後混元皇帝伯陽有子曰宗仕魏有功封於段干後以邑爲氏

三十諫

諫

元和姓纂曰周禮有司諫子孫以官爲氏漢有治書侍史諫忠見風俗通

晏

出自姜姓齊公族晏弱爲卿諡桓子弱生平仲嬰嬰生圉及其族晏羗晏父戎爲齊大夫南燕尙書郎謨青州人

參龍

出自古諸侯颺叔安裔子董父實甚好龍能求其嗜欲以飲食之龍多歸之乃擾龍以事帝舜帝賜之姓曰有董氏曰參龍參龍官名官有世功則又以官爲氏御龍亦如之  
三十一欄

簡

集韻曰胡莧切姓也讀若綻姓苑又音漏

三十二霰

倩倉甸切

出集韻

殿

○案此條原本次嬌氏後依廣韻移正

崇寧間有商人殿全自虔州石城徙居撫州自言本姓犯  
宣祖諱下一字建隆中其祖以訟至縣縣令因字形更爲  
殿氏

練

姓苑云南康人今建安多此姓自言先世仕閩食邑於閩  
之練鄉因以爲氏

見

同川人又音睨

燃

出姓苑燃奴甸切同州人又音睨

縣潘



禮記衛太史柳莊卒君與之邑裘氏與縣潘氏裘縣潘皆  
邑名以邑爲氏故元和姓纂曰衛大夫有縣潘氏

三十三線

鮮

集韻音線韻譜曰本音平聲亦有音變而爲去聲者

單

韻譜廣韻上去聲皆有單氏而二書主吳音多以上聲爲  
正姓纂亦然今詳字有兩音須審擇其一不宜皆出以誤  
後學今世單氏人皆呼去聲合移入去聲三十三線爲定

譴聲 去

出姓苑譴氏遼東人

援

出姓苑

眷

元和姓纂曰代北茂眷氏改爲眷氏

○案此與平聲一東去聲五十侯說不同

氏族略作茂眷氏改爲眷氏

繇

與戀同漢有南郡太守戀祕

卞

謹按莊子湯時有卞隨又春秋時魯晉皆有卞邑未知何

獨出於曹也

案廣韻謂本曹叔振鐸之支子封于卞遂以建族原本不載此文似未明晰今日以備考

弁

劉曜有太史令弁廣明

羨

出姓苑

鄚善

西域國人以國爲氏

羨門

秦始皇時燕人羨門子高稱有仙道形解銷化之術

古今姓氏書辨證卷三十二終

古今姓氏書辨證卷三十三

三十五笑

召

出自姬姓周同姓功臣曰太保奭食王畿之召邑爲天子三公謂之召公分陝以主諸侯謂之召伯裔孫召穆公虎至簡公盈皆襲爵土爲王卿士其支庶仕諸侯以國爲氏者齊有召忽秦有東陵侯召平及召不疑

寮

寮音

本姓牛氏魏將軍牛金爲司馬宣王所殺子元定避難安定改姓寮氏

召伯

元和姓纂曰左傳召伯奭之後

少正

邵氏曰魯有少正卯謹按周書康誥少正

案少正御事出酒誥此作康誥

誤

蓋小宰小司徒之類周制六官之長曰正則其貳謂之

少正孔子誅卯蓋其先必因官以少正爲氏不然則少正卯之官爾

少師

英賢傳魯有少師陽少師慶謹按樂官有少師古人世官或有以爲氏者然陽慶特稱其名

少叔

謹按邵氏以仲尼弟子爲少叔乘誤矣乘乃步叔也

少西

出自嬀姓陳公子夏之後別爲少西氏

少王

邵氏以小王桃甲爲少王氏誤矣左傳無少王氏

少施

世本曰施父之後支孫爲少施氏雜記曰孔子曰吾食於

少施氏

三十六效

豹

出自高辛氏子八元叔豹之後

淖音開

謹按楚將淖齒殺齊湣王又漢江都易王美人淖姬集韻  
人姓音卓未知孰是又漢成帝召趙飛燕及其女弟入宮  
姿性穠粹左右見之皆嘖嘖嗟賞有宣帝時披香博士淖  
方成在帝後唾曰此禍水也滅火必矣

校師

姓源韻譜曰鄭人欲毀鄉校子產曰是吾師也因有校師  
氏誤矣

三十七號

到

元和姓纂曰楚令尹屈到之後以王父字爲氏宋梁間有  
到彥之到溉到洽望出彭城太原謹按李延壽南史曰到

氏楚大夫屈到後誤也屈到字子夕古人以王父字爲氏  
無氏其名者疑到氏之先別有所本宋齊以來彭城武原  
到氏彥之字道豫宋南豫州刺史建昌忠公與王華王曇  
首皆配食文帝廟庭長子元度益州刺史少子仲度嗣爵  
爲驃騎從事中郎兄弟並有才用皆早卒仲度子撫賁遁  
坦賁襲建昌公後還爵於撫遁南海太守撫五兵尙書子  
沆字茂瀝梁殿中曹侍郎坦齊中書郎三子沼灑洽俱知  
名灑字茂灌梁金紫光祿大夫散騎常侍子鏡字圓照太  
子舍人生蓋丹陽尹丞洽字茂公梁御史中丞尋陽太守  
謚理子仲舉字德言陳侍中尙書僕射子郁尙陳公主官  
至宣城太守梁武帝嘗謂任昉曰諸到可謂才子昉曰臣



嘗竊議宋得其武梁得其文陸倕詩曰既有絕塵到謂漑  
洽兄弟也

受

音到亦呼作瀑集韻音號

○案集韻受刀  
号切無號音

後魏河南姓也

郅

出自姬姓晉有高昌長郅玖

操

隋大業末有鄱陽賊操天成自號元興王建元始興又有  
操師乞亦鄱陽人自號元興王建元天成謹按新唐書林  
士宏傳隋末饒州鄱陽人操師乞爲盜自號元興王建元  
天成大業十二年據豫章爲隋治書侍御史劉子翊討殺

之今依新書

暴

酷吏傳有南陽豪猾大姓孔暴二家

漕

去聲

漢書游俠傳注漕姓也

盱

去聲

盱與好同說文曰皆人姓呼報切

悼

出姓苑與叟同

案廣韻悼徒到切叟薄報切二字音義絕遠疑有脫誤

三十八箇

賀

後燕有清河太守賀耕南涼僣檀將賀連宋忻州定襄賀氏易州刺史惟忠善守邊有傳生昭慶西京作坊使知通遠軍 開封陳留賀氏右千牛衛率府率景女爲孝惠皇后后兄懷浦六宅使平州團練使生令圖平州團練使知雄州與其父首謀北伐一歲中父子俱陷焉有傳 蔡州賀氏中散大夫應誠生撫辰光祿大夫撫辰生坦奉議郎坦生允中字子忱吏部員外郎左朝散郎福建路轉運判官 洛州賀氏信生百祥朝議大夫百祥生勉及宗彥臨晉令勉承議郎生希仁紹聖四年進士 濟南賀氏九臯生適中秉義郎適中生旂朝散郎二子紱宣和三年進士 網宣和六年進士 會稽賀氏鑄字方回舊字師聖以文

詞稱 齊州臨邑賀氏光祿卿志誠生僅中散大夫二子  
蒙太廟齋郎隨鄧州司法參軍隨生衛政和五年上舍  
密州賀氏寬生良臣良臣生瑋承議郎瑋生端紹聖四年  
進士權生漢臣朝奉大夫漢臣生珪朝奉大夫珪生天覺  
政和五年上舍

### 賀蘭

周書賀蘭祥傳曰其先與魏俱起有紇伏者爲賀蘭莫何  
弗因以爲賀蘭氏唐貞觀所定洛州河南郡十四姓一曰  
賀蘭按北人八族有賀蘭氏自稱李陵之後居賀蘭山下  
因以爲氏後改爲賀氏支屬亦有不改者

### 賀若

北俗謂忠正爲賀若後魏孝文時代人皆改單姓唯賀若氏以先祖有忠正之稱不改仍爲賀若氏

賀遂

晉初稽胡楚賜姓呼延居西夏州後魏呼延勒爲定州刺史居定陽鎮賜姓賀遂其後音訛又改爲賀悅

賀婁

河南高仙芝破勃律時有裨將賀婁餘閏

賀敦

孔至姓氏雜錄曰後魏賀敦氏改爲賀氏

賀賴

南燕有輔國將軍遼西公賀賴廬後爲北人八族賀氏匈奴

奴單于賀賴頭率部落三萬五千降慕容雋拜宣西將軍  
封雲中郡公

賀魯

出後魏官氏志賀魯改周氏

○案今官氏志無此文

賀葛

出後魏官氏志後賀葛改葛氏

賀兒

賀兒改兒氏

賀六渾

北齊神武之姓

三十九過

播

商賢人播鼗武誤矣謹按播鼗樂師也非以官氏

破丑

唐時党項居靈山者曰破丑氏

破六汗

後魏三字姓

破多羅

後魏代北人姓後改爲潘氏

四十禡

謝

出自黃帝之後任姓之別爲十族謝其一也其國在南陽

宛縣三代之際微不見至詩嵩高始言周宣王使召公營  
謝邑以賜申伯蓋謝已失國子孫散亡以國爲氏魯有成  
大夫謝息至晉宋間出陳郡者始爲大族受封陽夏及康  
樂者各以其封著望云陳郡陽夏謝氏典農中郎將纘生  
衡國子祭酒二子鯤袁鯤字幼輿太常咸亭康侯生尚字  
仁祖衛將軍開府儀同三司咸亭簡侯袁字幼儒吏部尚  
書

案晉書謝安傳

作父哀太常卿

六子奕據安萬石鐵奕字無奕豫州刺

史安西將軍三子淵靖立淵字叔度義興太守靖太常二  
子玩虔玩豫寧伯立字幼度車騎將軍開府儀同三司康  
樂獻武公生瑒祕書郎生靈運宋永嘉太守臨川內史康  
樂公生鳳鳳生超宗齊竟陵王征北諮議二子才卿幾卿



才卿生藻幾卿梁左光祿長史據字元通二子朗允朗字  
長度晉東陽太守生重字景重會稽王道子驃騎長史五  
子絢瞻晦矚遜絢字宣映宋文帝鎮軍長史生世基瞻字  
宣遠宋豫章太守生紹晦字宣明宋領軍將軍散騎常侍  
建平郡公文帝討擅弑少帝罪伏誅生世休矚字宣鏡宋  
黃門侍郎生世平允字令度宣城內史四子裕純彪述裕  
字景仁宋尚書左僕射生恂字泰溫鄱陽太守生孺子宋  
西陽太守生璟梁左戶尚書侍中生微南蘭陵太守純字  
景懋南平相彪字景彪司徒右長史述字景先宋吳興太  
守左衛將軍三子綜約緯綜太子中舍人緯正員郎

○案  
郎下

當有  
中字

生眇字元暉齊尚書郎生謨梁信安令王府諮議安

字安石晉太傅文靖公二子瑤炎瑤琅邪王友四子該模  
澹璞該東陽太守生承伯模光祿勳澹字景恒宋侍中特  
進金紫光祿大夫璞字景山光祿勳炎字瑗度會稽內史  
贈侍中司空望蔡忠肅公三子肇峻混肇晉驃騎將軍散  
騎常侍峻晉散騎侍郎建昌侯混字叔源尚書左僕射萬  
字萬石晉淮南太守散騎常侍生韶字穆度車騎司馬生  
思字景伯晉武昌太守二子曜御史中丞弘微太常建昌  
侯生莊字希逸宋中書令散騎常侍金紫光祿大夫朏字  
敬沖齊侍中司徒尚書令中書監顥字仁悠齊北中郎長  
史瀟字義潔齊太子詹事贈金紫光祿大夫朏二子諤司  
徒右長史諤右光祿大夫生哲字頴豫陳吏部尚書瀟二

子覽字景滌齊吳興太守贈中書令舉字言揚梁侍中衛  
將軍開府儀同三司覽二子儁字國美梁侍中札字世高  
梁湘東王諮議舉生嘏梁侍中中書令都官尚書儁生禕  
嘏二子儼字儼太常伯尚書僕射石字石奴晉司空南康  
襄公生汪鐵字鐵石永嘉太守二子邈晉吳興太守沖晉  
中書郎贈散騎常侍生方明宋會稽太守二子惠連宋彭  
城王法曹行參軍惠宣臨川太守唐貞觀三年閏十二月  
丁未東謝酋長謝元深南謝酋長謝强來朝諸謝皆南蠻  
別種在黔州之西詔以東謝爲應州南謝爲莊州隸黔州  
都督

夜

漢靈帝光和中雒陽男子夜龍以弓箭射北闕風俗通曰  
夜姓也龍有從兄陽

斥

音拓

元和姓纂曰又充夜切今蔡州有此姓出爾雅斥山

射

○案此條原本次化氏後依廣韻移正

謹按漢書律厯志

案原本誤作郊志今改正

武帝改元封七年爲太

初元年詔大中大夫公孫卿壺遂太史令司馬遷侍郎尊  
大典星射姓等議造漢厯師古曰姓射名姓也下文云姓  
等奏不能爲算願募治厯者師古曰姓卽射姓也三輔決  
錄曰後漢末大鴻臚射服天子以爲將軍出征姓射名服  
不祥改姓射名威威子監揆監蜀郡太守揆中郎將

華去聲

出自子姓宋戴公孫督字華父爲宋太宰弑其君殤公及其大夫孔父厚賂齊秦魯鄭四國不能討使相宋公因自立爲華氏古未有生而賜族者惟督以一時之妄自立姓氏後世因之督孫華耦及其族喜御事元臣費遂世系具春秋人譜舊姓書云戴公子考父食邑於華氏焉誤矣今華氏望出高唐沛國譙縣赫連勃勃有尙書華韜宋州下邑華氏溫琪仕梁爲節度使仕唐爲太子少保

化

見姓苑

下門

國語周景王大夫下門子之後因氏焉世本晉有大夫下門聰

下陽

春秋公子譜曰姬姓虢叔之後謹按虢之二邑曰上陽下陽

四十一漾

出自子姓宋文公赤生子曰肸字向父其孫以王父字爲氏春秋時向戌食邑於合謂之合左師生宜及鄭世系具春秋人譜其曰出姜姓附庸向國爲莒所滅以國爲氏誤矣案通志向出自祁姓爲附庸國

暢

風俗通云出姜姓齊後有暢惠明著論語義注十卷唐有詩人暢當及暢整今望出魏郡宋朝有都官郎中暢均河南人河中暢守真生熙熙生括錄事叅軍括生彥雄政和五年上舍

匠

姓源韻譜曰周禮匠人之後風俗通曰氏於事者巫卜陶匠

尙

漢高士尙長字子平河南朝歌人今望出汲郡及清河上黨唐末賊尙君長

償

亦作賞音上姓苑云吳中八族其一償氏晉有郗隆主簿  
償慶

望

風俗通云齊太公望後姓苑云今魏興人史記齊太公覓  
文王曰吾太公望子久矣因號太公望後氏焉

相

漢武落山四姓一曰相氏後秦有馮翊相雲作德獵賦又  
望出西河唐貞觀所定汾州西河郡四姓其一相氏

匠僂

後魏官氏志匠僂氏改爲僂氏

○案今官氏志有匹婁氏改爲婁氏與廣韻所引同



無匠僂氏  
文疑此誤

望出河南

匠麗

左傳晉大夫匠麗氏漢功臣表有祝其侯匠麗舒

尙方

漢朱博傳長陵大姓尙方禁少時嘗盜人妻見斫創着其  
頰府功曹受賂白除禁調守尉太守朱博聞知以他事召  
見視其面果有瘢博辟左右問禁禁叩頭服狀博笑曰大  
丈夫固時有是

○案原本誤作大夫因時有是事今據漢書改正

馮翊欲洒卿恥

技拭用禁因勅禁毋得泄語有便宜輒記言因親信之以  
爲耳目禁晨夜發起部中盜賊及它伏姦有功效博擢禁

連守縣令

四十二宕

浪

晉永嘉末張平保青州爲其下浪逢所殺

盜

於浪切

出姓苑音鳥浪反

嘗

集韻作嘗丁浪反又音黨

案原本作党廣韻不載此字党係黨俗字今改爲嘗字與集韻

同本出西羌姚秦將嘗耐虎代爲羌豪又羽林監嘗成後

居華陰吳平男嘗娥後居同州

伉

音抗

謹按後漢書注風俗通曰衛大夫三伉之後漢有伉喜爲

漢中守乃抗字

亢

唐韋臯鎮蜀有部將亢榮朝以兵破吐蕃

阮

魯大夫氏左傳司馬牛卒於魯郭門外阮氏卽其家也

曠

風俗通云師曠之後宋潭州曠元則生用宗用宗生無忌  
無忌生湜字次淵紹興二年進士

古今姓氏書辨證卷三十三終

